

# 魏晉南朝都督與都督區

## 嚴 耕 望

### 目 次

引言	三、都督區
一、都督	(甲)三國與西晉 (丙)宋齊
二、都督與屬州刺史之關係	(乙)東晉 (丁)梁陳

### 引 言

唐代節度方鎮之制，影響於有唐一代之治亂者至深且鉅。李吉甫撰元和郡縣圖志，諸道之下，以節鎮綱紀諸州；歐陽修撰新唐書，亦有方鎮表以志其分合演變；皆具卓識。故後之讀唐史者，於節鎮制度瞭然在目。按唐代節鎮實脫胎於隋及唐初之總管都督之制；而隋及唐初之總管都督則本之於魏晉南北朝之都督軍事制度。魏晉南北朝時代，都督對於屬州之控制權雖較唐代節鎮之於屬州為弱，然影響政局亦至深遠。且就督區而言，其固定性既不在唐代節度區之下，而幅員則又過之，故魏晉南北朝之此一制度實為一重要而至堪注意之制度。迺此一時代之各朝正史，惟宋書百官志及南齊書百官志略述其職權；至都督與刺史之關係，以及都督區域之演變，曾不涉筆；致千百年來，不但讀史者只明州制而闇於都督，即考史者亦囿於舊典，每取輕而遺重。如近人吳廷燮撰魏晉方鎮年表，以刺史與都督並列，事猶可諒；至東晉以下，更通列州刺，不注都督，蓋以都督統軍例由重要州刺史兼充、不別用人故耳。實則刺史位任頗輕（四五品），加都督或且督數州者，稱為統府或都督府，乃為重任，是為方鎮；僅為刺史，非方鎮之任也。晉書范甯傳，疏云：「夫府以統州，州以監郡，郡以蒞縣。」同書應詹傳，疏云：「都督可課佃二十頃，州十頃，郡五頃，縣三頃。」宋書索虜傳，肅（魏太武帝）與太祖書更曰：「可善敕方鎮、刺史、守、宰，嚴供張之具，來秋當往取揚州。」皆為明證。吳表目標方鎮，通列刺史而忽都督，得非更失輕重之權歟？至於東晉以下都督統攝之區域，更歷千載曾無論及者，亦得非一大憾事歟？爰不揣魯

鈍，輯諸史傳，考而述之。惟北朝督區除關中之外，其固定性皆較小，故此文所論以魏晉南朝為限。

民國四十四年八月廿二日於南港舊莊

## 一、都 督

宋書百官志上述持節都督之起源云：

「持節都督無定員。前漢遣使始有持節。光武建武初征伐四方，始權時置督軍御史；事竟罷。建安中，魏武帝為相，始遣大將軍督軍。二十一年征孫權還，夏侯惇督二十六軍，是也。魏文帝黃初二年，始置都督諸州軍事，或領刺史。三年，上軍大將軍曹真都督中外諸軍事，假黃鉞；則總統內外軍事矣。」

而南齊書百官志則云：

「魏晉世，……刺史任重者為使持節、都督，輕者為持節、督。起漢順帝時御史中丞馮緜討九江賊，督揚徐二州軍事。而何、徐、宋志云起魏武遣諸州將督軍，王珪之職儀云起光武，並非也。」

按：齊志云起於漢順帝時，是也。後漢書馮緜傳：「拜御史中丞。順帝末，以緜持節督揚州諸郡軍事，與中郎將滕撫擊破羣賊。」隸釋有車騎將軍馮緜碑，作「御史中丞督使徐揚二州討賊。」齊志所云馮赦，即緜也，而後漢書順帝紀亦作馮赦，並誤。

又按宋志云：「魏文帝黃初二年，始置都督諸州軍事，或領刺史。」則大多數不領刺史也。而南齊書百官志則云：

「晉太康中，都督知軍事，刺史治民，各用人。惠帝末，乃並任。非要州，則單為刺史。」

此亦與宋志頗異。按：馮緜督徐揚二州諸郡軍事，即不領刺史。其定制當始於魏，不始於晉。魏志曹爽傳注引魏略，桓範為都督青徐諸軍事，另有徐州刺史鄒岐，同治下邳。又滿寵傳，太和三年，以前將軍都督揚州諸軍事，與揚州刺史王凌共事，不平。此二事即其明證。吳廷燮三國方鎮年表，揚州、荊州、雍州諸卷，皆都督與刺史並列，任都督者與任刺史者絕大多數皆同時各用人，則桓範滿寵兩事，決非偶然。惟亦有以都督領刺史者，舉例如次：

夏侯尚傳：文帝踐阼，……遷征南將軍，領荊州刺史，假節，都督南方諸軍事。

毋丘儉傳：遷左將軍，假節，監豫州諸軍事，領豫州刺史。

王基傳：遷鎮南將軍，都督豫州諸軍事，領豫州刺史。

曹休傳：文帝初，以休爲鎮南將軍，假節，都督諸軍事，遷征東將軍，領揚州刺史。

此幾爲魏志中僅見之事例，則宋志是也。晉武帝世亦有此類情形，如：

衛瓘傳：泰始中，除征北大將軍、都督幽州諸軍事、幽州刺史。

王渾傳：泰始中，轉征虜將軍，監豫州諸軍事，假節，領豫州刺史。

胡威傳：累遷監豫州諸軍事、右將軍、豫州刺史。

東莞王佃傳：泰始初，拜右將軍、監兗州諸軍事、兗州刺史。

按此四例皆在武帝初泰始年間。據此而言，自魏迄晉初，都督與刺史例各用人，惟亦偶有以都督領刺史耳。蓋太康中始有嚴格之規制，二者必各用人，不得兼領，故南齊志云然。但太康至惠帝末不過二十年，自此以後凡都督必領治所之刺史矣。惟宋書江夏王義恭傳，元嘉十七年，爲使持節、侍中、都督揚南徐兗三州諸軍事、司徒、錄尚書事，不領刺史；陳書亦有二三事；皆爲絕無僅有之事例。

宋書百官志上又述晉世統軍加節之制云：

「晉世，都督諸軍爲上，監諸軍次之，督諸軍爲下；使持節爲上，持節次之，假節爲下。使持節得殺二千石以下；持節殺無官位人，若軍事，得與使持節同；假節，唯軍事得殺犯軍令者。」

此段敘事甚簡明，但未上溯魏制。與前引齊志云「魏晉世」者小異。考之史傳，魏世都督諸軍事極常見，不待舉例。而監諸軍事亦數見。如魏志趙儼傳，明帝卽位，復爲尚書，監豫州軍事；齊王卽位，以儼監雍涼軍事。毋丘儉傳，遷左將軍、假節、監豫州諸軍事，領豫州刺史。晉書魯芝傳，常道鄉公卽位，遷監青州諸軍事、振武將軍、青州刺史。同書王沈傳，魏末，出監豫州軍事、奮武將軍、豫州刺史。是也。又趙儼傳，監雍涼軍事下，復云：「遷征西將軍、都督雍涼。」晉書文帝紀甘露四年六月，「使石苞都督揚州，陳騫都督豫州，鍾毓都督徐州，宋鈞監青州諸軍事。」是明「監」

## 魏晉南朝都督與都督區

與「都督」不同，位在「都督」之下也。至於督軍事則稀見。魏志田豫傳，「督青州諸軍事，假節。」夏侯尚傳，許允「爲鎮北將軍、假節、督河北諸軍事。」是幾爲僅見之史例矣。魏世，「假節」亦常見於三國魏志諸列傳，不待舉例。至於「持節」「使持節」者，魏志諸傳中雖不常見，然亦不無其例。如毋邱儉傳，青龍中，「徙爲幽州刺史，加度遼將軍、使持節、護烏丸校尉。」田豫傳，文帝初，「使豫持節護烏丸校尉。」是也。惟諸州都督則不見此例。而晉書諸開國功臣傳述魏末諸州都督則頗有「使持節」「持節」者。如衛瓘傳，鍾會事平，除使持節、都督關中諸軍事。陳騫傳，壽春平，拜使持節、都督淮北諸軍事。王沈傳，魏末，遷征虜將軍、持節、都督江北諸軍事。是其例。又魏志王粲傳，吳質「官至振威將軍、假節、都督河北諸軍事。」而注引魏略，作「使持節、督幽并諸軍事。」劉馥傳，子靖「遷鎮北將軍、假節、都督河北諸軍事。」而水經鮑邱水注引劉靖碑：「魏使持節、都督河北諸軍事、征北將軍、建城鄉侯沛國劉靖」云云，時在嘉平中。則魏諸州都督實有「使持節」者，魏志失書耳。綜此而言，魏世任職者，有「假節」，有「使持節」，而「持節」甚少，或竟無；「都督諸軍事」爲多，亦有「監諸軍事」，而「督諸軍事」則少見。又魏志曹爽傳注引魏略：「桓範……明帝時，……遷征虜將軍、東中郎將、使持節、都督青徐諸軍，治下邳，與徐州刺史鄒岐爭屋，引節欲斬岐。」是持節之威權亦不始於晉也。然則宋志所述晉制，實亦承魏者。南齊志云「魏晉世」爲是。

統軍既有「都督」、「監」、「督」三級，加節亦有「使持節」、「持節」、「假節」三級。其配合方式並非「都督」卽「使持節」，「監」卽「持節」，「督」卽「假節」。而採較複雜配合方式，茲就各種方式略舉常見事例如次：

- (1) [都督諸軍事] + [使持節]……自西晉終南朝，此類最多，傳中隨處可見。
- (2) [都督諸軍事] + [持節]……此例亦極多，茲就晉宋齊梁陳五書各舉三四例如次：

晉書汝南王亮傳：持節、都督關中雍涼諸軍事。

同書王浚傳：持節、都督幽州諸軍事。

同書新蔡王騰傳：持節、都督并州諸軍事、并州刺史。

同書高密王泰傳，子略：持節、都督沔南諸軍事。

宋書劉道憐傳：持節、都督兗青二州晉陵京口淮南諸郡軍事、兗青二州刺史。  
同傳：持節、都督荆湘益秦寧梁雍七州諸軍事、荊州刺史。  
同書沈攸之傳：持節、都督荆湘雍益梁寧南北秦八州諸軍事、荊州刺史。  
南齊書安陸王子敬傳：持節、都督荆湘梁雍南北秦六州、荊州刺史。  
同書宜都王鑾傳：持節、都督南豫司二州諸軍事、南豫州刺史。  
同書武陵王曄傳：持節、都督會稽東陽新安永嘉臨海五郡諸軍事、會稽太守。  
同書崔慧景傳：持節、都督梁南北秦沙四州軍事、梁南秦二州刺史。  
梁書長沙嗣王業傳：持節、都督梁南北秦沙四州諸軍事、梁南秦二州刺史。  
同書元法僧傳，子景隆：持節、都督廣越交桂等十三州諸軍事、廣州刺史。  
同書羊雅仁傳：持節、都督南北司豫楚四州諸軍事、北司州刺史。  
同書蕭藻傳：持節、都督益寧二州諸軍事、益州刺史。  
陳書鄱陽王伯山傳：持節、都督東揚豐二州諸軍事、東揚州刺史。  
同書晉熙王叔文傳：持節、都督江州諸軍事、江州刺史。  
同書江夏王伯義傳：持節、都督合霍二州諸軍事、合州刺史。  
同書淳于量傳：持節、都督桂定東西甯等四州諸軍事、桂州刺史。

(3) [都督諸軍事] + [假節]……三國魏志，凡「都督」皆云「假節」。晉世尙多此類，聊舉五例如次：

晉書高密王泰傳：假節、都督關中諸軍事。  
羊祜傳：假節、都督荊州諸軍事。  
胡奮傳：假節、都督荊州諸軍事。  
淮南王允傳：假節、都督揚江二州諸軍事。  
荀組傳：假節、都督豫州諸軍事。

宋以後則少此例，列舉如次：

南齊書張沖傳：假節、都督青冀二州北討諸軍事、青冀州刺史。  
陳書南康王曇朗傳：子方慶：假節、都督定州諸軍事、定州刺史。  
同書陳詳傳：假節、都督吳州諸軍事、吳州刺史。

(4) [監諸軍事] + [使持節]……此例於晉宋齊亦頗常見，舉例如次：

## 魏晉南朝都督與都督區

晉書唐彬傳：使持節、監幽州諸軍事。

同書周馥傳，裴憲：使持節、監豫州諸軍事。

宋書文帝紀：使持節、監徐兗青冀四州諸軍事、徐州刺史。

同書劉道憐傳，子義欣：使持節、監豫司雍并四州諸軍事、豫州刺史。

同書武昌王渾傳：使持節、監雍梁南北秦四州、荊州之竟陵隨二郡諸軍事、雍州刺史。

同書劉秀之傳：使持節、監益寧二州諸軍事、益州刺史。

同書晉熙王昶傳，子燮：使持節、監郢州、豫州之西陽、司州之義陽二郡諸軍事、郢州刺史。

同書建平王宏傳：使持節、監湘州諸軍事、湘州刺史。

同書始安王子真傳：使持節、監廣交二州、始興始安臨賀三郡諸軍事、廣州刺史。

南齊書張岱傳：使持節、監南兗兗徐青冀五州諸軍事、南兗州刺史。

同書垣崇祖傳：使持節、監豫司二州諸軍事、豫州刺史。

同書王奐傳：使持節、監湘州軍事、湘州刺史。

(5) [監諸軍事] + [持節]……此例於宋齊兩書所見較多。

宋書蕭思話傳：持節、監徐兗青冀四州、豫州之梁郡諸軍事、兗徐二州刺史。

同書沈攸之傳：持節、監郢州諸軍事、郢州刺史。

同書吉翰傳：持節、監司雍并三州諸軍事、司州刺史。

南齊書安陸王子敬傳：持節、監南兗兗徐青冀五州諸軍事、南兗州刺史。

同書王玄載傳：持節、監兗州緣淮諸軍事、兗州刺史。

同書長沙王晃傳：持節、監豫司二州(有脫文)之西陽諸軍事、豫州刺史。

同書曹虎傳：持節、監雍州、郢州之竟陵、司州之隨郡軍事、雍州刺史。

同書晉安王子懋傳：持節、監湘州諸軍事、湘州刺史。

(6) [監諸軍事] + [假節]……此例於晉書所見最多，其後則甚少。

三國魏書毋邱儉傳：假節、監豫州諸軍事，領豫州刺史。

晉書汝南王亮傳：假節、監豫州諸軍事。

同書胡奮傳：假節、監并州諸軍事。

同書王處傳：假節、監青州諸軍事。

同書荀崧傳：假節、監沔北諸軍事。

同書謝萬傳：假節、監司豫冀并四州軍事、豫州刺史。

宋書吉翰傳：假節、監徐兗二州、豫州之梁郡諸軍事、徐州刺史。

南齊書張沖傳：假節、監青冀二州刺史。

(7) [督諸軍事] + [使持節]……此例於宋書以下多有之。

宋書劉敬宣傳：使持節、督北青州軍郡事、北青州刺史。

同書垣護之傳：使持節、督豫司二州諸軍事、豫州刺史。

同書邵陵王友傳：使持節、督江州、豫州之西陽新蔡晉熙三郡諸軍事、江州刺史。

同書始安王休仁傳：使持節、督江州、南豫州之晉熙新蔡、郢州之西陽三郡諸軍事、江州刺史。

同書黃回傳：使持節、督郢州、司州之義陽諸軍事、郢州刺史。

同書沈攸之傳：使持節、督雍梁南北秦四州、郢州之竟陵諸軍事、雍州刺史。

同書張興世傳、劉遵考傳、袁凱傳，使持節督諸軍事略同。

同書張茂度傳：使持節、督益寧二州、梁州之巴西梓橦宕渠南漢中、秦州之懷寧安固六郡諸軍事、益州刺史。

同書同傳：使持節、督廣交二州諸軍事、廣州刺史。

同書吳喜傳：使持節、督交州、廣州之鬱林寧浦二郡諸軍事、交州刺史。

南齊書安成王高傳：使持節、督江州、豫州之晉熙諸軍事、江州刺史。

同書鄱陽王鏘傳：使持節、督雍梁南北秦四州、郢州之竟陵、司州之隨郡軍事、雍州刺史。

同書同傳：使持節、督江州諸軍事、江州刺史。

梁書元樹傳：使持節、督郢司霍三州諸軍事、郢州刺史。

同書夏侯亶傳，弟夔：使持節、督司州諸軍事、司州刺史。

## 魏晉南朝都督與都督區

同書蕭景傳：使持節、督雍梁南北秦、郢州之竟陵、司州之隨郡諸軍事、雍州刺史。

同書同傳：使持節、督南北兗北徐青冀五州諸軍事、南兗州刺史。

(8) [督諸軍事] + [持節]……此例亦於宋書以下多有之。

晉書溫嶠傳：「咸和初，代應詹爲江州刺史，持節、都督、平南將軍，鎮武昌。」

宋書顏師伯傳：持節、督青冀二州、徐州之東安東莞、兗州之濟北三郡諸軍事、青冀二州刺史。

同書朱齡石傳：持節、督關中諸軍事、雍州刺史。

同書武陵王贊傳：持節、督郢州、司州之義陽諸軍事、郢州刺史。

同書劉道產傳：持節、督雍梁南秦三州、荊州之南陽竟陵順陽襄陽新野隨六郡諸軍事、雍州刺史。

同書蕭惠開傳：持節、督益寧二州諸軍事、益寧二州刺史。

南齊書陸慧曉傳：持節、督南兗兗徐青冀五州諸軍事、南兗州刺史。

同書垣崇祖傳：持節、督兗青冀三州諸軍事、兗州刺史。

同書裴叔文傳：持節、督徐州諸軍事、徐州刺史。

同書桓康傳：持節、督青冀二州、東徐之東莞琅邪二郡朐山戍、北徐之東海漣口戍諸軍事、青冀二州刺史。

同書建安王子真傳：持節、督南豫司二州軍事、南豫州刺史。

同書始安王道生傳、崔慧景傳：持節、督皆略同。

同書沈文秀傳：持節、督郢州、司州之義陽諸軍事、郢州刺史。

同書晉熙王錄傳：持節、督略同。

同書和帝紀：持節、督荆雍益寧梁南北秦七州諸軍事、荊州刺史。

同書蕭赤斧傳：持節、督雍梁南北秦四州(略)軍事、雍州刺史。

同書張瓌傳：持節、督同上。

同書曹虎傳：持節、督梁南北秦沙四州諸軍事、梁南秦二州刺史。

同書陳顯達傳：持節、督廣交越三州、湘州之廣興軍事、廣州刺史。

梁書昌義之傳：持節、督南兗兗徐青冀五州諸軍事、南兗州刺史。

同書明山賓傳：持節、督緣淮諸軍事、北兗州刺史。

同書裴邃傳：持節、督豫北豫霍三州諸軍事、豫州刺史。（馬仙琕傳全同）

同書夏侯宣傳：持節、督司州諸軍事、司州刺史。

同書安成王秀傳，子機：持節、督湘衡桂三州諸軍事、湘州刺史。

同書韋粲傳：持節、督衡州諸軍事、衡州刺史。

同書樂藪傳：持節、督廣交越三州諸軍事、廣州刺史。（衡陽王元簡傳全同。）

### 蕭景傳略同）

陳書趙知禮傳：持節、督吳州諸軍事、吳州刺史。

(9) [督諸軍事] + [假節]……此例大都爲小鎮，齊梁爲多。

晉書謝尚傳：假節、督揚州之六郡諸軍事、豫州刺史。

南齊書王廣之傳：假節、督徐州諸軍事、徐州刺史。

同書周山圖傳：假節、督兗青冀三州、徐州東海朐山軍事、兗州刺史。

同書蘇侃傳：假節、督巴州軍事、巴州刺史。

同書傅琰傳：假節、督益寧二州軍事、益州刺史。

梁書康紹傳：假節、督北兗州緣淮諸軍事、北兗州刺史。

同書昌義之傳：假節、督北徐州諸軍事、北徐州刺史。

同書馮道根傳：假節、督豫州諸軍事、豫州刺史。

同書張齊傳：假節、督益州外水諸軍事、巴西太守。

綜上觀之，統軍之「都督」、「監」、「督」三等與加節之「使持節」、「持節」、「假節」三等交互配合，即此三等之任何一等可與彼三等之任何一等配合，共得九種方式。而史傳又有「都督」「監」「督」而不書加節者，其例且甚多，疑爲史家省書。然下列數例可注意：

宋書王宏傳：「(義熙)十四年，遷監江州、豫州之西陽新蔡二郡諸軍事、撫軍將軍、江州刺史。永初九(元)年，加散騎常侍。……太祖卽位，……加使持節、侍中，改監爲都督，進號車騎大將軍。」

同書謝晦傳：「少帝既廢，司空徐羨之錄詔命，以晦行都督荆湘雍益南北

秦七州諸軍事、撫軍將軍，領南蠻校尉、荊州刺史。欲令居外爲援；盧太祖至，或用他人，故遞有此授。太祖卽位，加使持節，依本位除授。」

同書豫章王子尚傳：「遷揚州刺史。大明二年，加撫軍將軍。三年，浙江西立王畿，以浙江東爲揚州，命子尚都督揚州、江州之鄱陽晉安建安三郡諸軍事、揚州刺史，將軍如故。……七年，加使持節，進號車騎大將軍。」

同書始平王子鸞傳：「都督南徐州諸軍事。……前廢帝卽位，……加持節，之鎮。」

南齊書晉安王子懋傳：永明六年，「徙監湘州、平南將軍、湘州刺史。明年，加持節、都督。」

觀此五事，先不書加節者非省書也。據此以推，其他不書加節者或亦不盡屬省書歟？姑存待者。

統軍加節既有種種情形表現其輕重高低，故任職者往往有因功進級者，有因過降級者，舉例如次：

宋書劉道憐傳：子義欣，「遷使持節、監豫司雍并四州諸軍事、豫州刺史。……（元嘉）十年，進號鎮軍將軍，進監爲都督。」

同書松滋侯子房傳：「景和元年，……子房以本號（右將軍）督會稽東陽新安臨海永嘉五郡諸軍事、會稽太守。太宗卽位，改督爲都督，進號安東將軍。」

同書劉秀之傳：「遷使持節、督益寧二州諸軍事、寧朔將軍、益州刺史。……進號征虜將軍，改督爲監。」

同書蕭惠開傳：「爲持節、督青冀二州諸軍事、輔國將軍、青冀二州刺史。不行。改督益寧二州刺史，持節將軍如故。……太宗卽位，……進平西將軍，改督爲都督。」

同書黃回傳：「爲使持節、督郢州、司州之義陽諸軍事、平西將軍、郢州刺史。……回至鎮，進號鎮西將軍，改督爲都督。」

同書邵陵王友傳：「出爲使持節、督江州、豫州之西陽新蔡晉熙三郡諸軍事、南中郎將、江州刺史。……順帝卽位，進號左將軍，改督爲都督。」

南齊書垣崇祖傳：「徙爲使持節、監豫司二州諸軍事、豫州刺史，將軍如故。」

(冠軍將軍)。……及破虜，……進爲都督，號平西將軍。」

同書張敬兒傳：「爲持節、督雍梁二州、郢司二郡軍事、雍州刺史。……(沈)攸之反，……敬兒告變，……進號鎮軍將軍，加散騎常侍，改爲都督。」

同書曹虎傳：「隆昌元年，遷督雍州、郢州之竟陵、司州之隨郡軍事、冠軍將軍、雍州刺史。建武元年，進號右將軍。二年，進督爲監，進號平北將軍。」

梁書夏侯夔傳：「授持節、督司州諸軍事、信武將軍、司州刺史。……魏郢州刺史元願達請降，……改魏郢州爲北司州，以夔爲刺史，兼督司州。(大通)三年，遷使持節，進號仁威將軍。」

宋書巴陵王休若傳：「遷梁雍南北秦四州、荊州之竟陵隨二郡諸軍事、寧蠻校尉、雍州刺史，(使)持節(散騎)常侍(衛)將軍如故。……上大怒，……降號左將軍，貶使持節都督爲監，行雍州刺史。」

觀此數例，多爲「督」「監」「都督」之升降，而節之升降僅梁書一例。宋書巴陵王休若傳或亦可作如是觀。蓋當時所重仍在統軍之等級，而加節之等級或尚次要歟？

通典職官一九晉官品條，諸持節都督，第二品。宋官品條全同。其職之重，於此可見。

凡統軍，不論「都督」「監」「督」，皆加將軍，開府置佐。三國魏志杜恕傳：「爲河東太守。歲餘，遷淮北都督護軍。」趙儼傳：「徙都督護軍。」是魏都督諸州軍事有護軍也。晉書羊祜傳，爲散騎常侍、衛將軍、假節、都督荊州諸軍事；有軍司徐胤。又金石萃編二五關中侯劉韜墓誌：「晉故使持節、都督青徐諸軍事、征東將軍軍司、關中侯劉府君之墓……。」潛研堂金石文跋尾考魏晉公府將軍皆置軍司，其字當作軍師，晉避諱改司。考論甚詳。晉書石崇傳：「假節、監徐州諸軍事，鎮下邳。……至鎮，與徐州刺史高誕爭酒相侮，爲軍司所奏，免官。」則軍司蓋爲監視都督而設者歟？通典職官一八魏官品條有諸軍司及都督護軍，皆第五品。職官一九晉官品條全同。是通魏晉皆置此兩職，且位甚重也。又晉官品條有都督長史、司馬，第六品。按漢世將軍有長史、司馬。魏志滿寵傳，爲揚州都督，有長史。則晉官品條之都督長史司馬當亦承襲於魏者。劉宋以下，護軍軍司蓋已省，而以長史司馬爲上佐，其下置參軍，名目甚多，拙作魏晉南朝地方政府屬位考(刊本所集刊第二十本上冊)已詳考之，

今不重出。

## 二、都督與屬州刺史之關係

前引通典一九晉官品條，諸持節都督，第二品。宋官品條，同。又晉官品條，州刺史領兵者，第四品；宋官品條亦同，又云刺史不領兵者，第五品。則都督與刺史之地位懸距頗遠。

都督本爲治軍而設，南齊志云：「晉太康中，都督知軍事，刺史治民。」其實不始於晉，自不待言。晉書溫嶠傳，奏云：「古鎮將多不領州，皆以文武形勢不同故也。」時入東晉不過十一二年，所謂「古」當指魏世，殆可斷言。惟其職在統軍，故顧和云：「非犯軍戎，不由都督。」見晉書本傳。

都督既與刺史分統軍民。都督地位既高，且常兼統兩州以上，而刺史爲一州行政長官，亦勢不能與軍事毫不相涉，故在軍事方面，刺史勢必統隸於都督。魏畧云：「是時冀州統屬鎮北。」(魏志曹爽傳注引)晉書華軼傳：「永嘉中，歷振威將軍、江州刺史。……軼自以受洛京所遣，而爲壽春所督。」是其證。又陳騫傳云：「出爲都督揚州諸軍事。……牽弘爲揚州刺史，不承順騫命。」亦謂刺史本應承順都督之命也。至於遣刺史用兵，更所常見。由此言之，都督對於刺史似有統轄指揮權，但事實上又不能完全運用；刺史似統屬於都督，但似又有獨立之地位；故二者之關係殊不正常。又晉書羊祜傳，奏云：「昔魏武帝置都督，類皆與州相近，以兵勢好合惡離。」二者之關係既不正常，又常同駐一城，故往往發生齟齬，魏世尤甚。茲就魏志列傳舉例如次：

滿寵傳：「以前將軍代(曹休)都督揚州諸軍事。……吳將孫布遣人詣揚州求降，……乞兵見迎。刺史王凌騰布書請兵馬迎之。寵以爲必詐，不與兵。……寵會被書當入朝，勑留府長史，若凌欲往迎，勿與兵也。凌於後索兵不得，乃單遣一督將步騎七百人往迎之，布夜掩擊，……。初寵與凌共事不平。凌支黨毀寵疲老悖謬，故明帝召之，既至，體氣康彊，見而遣還。

崔林傳：「文帝踐阼，拜尚書，出爲幽州刺史。北中郎將吳質統河北軍事，涿郡太守王雄謂林別駕曰：吳中郎將，上所親重，國之貴臣也。仗節統事，州郡莫不奉牋致敬；而崔使君初不與相聞。若以邊塞不修斬卿，使君寧能讓

卿耶？別駕具以白林。林曰，刺史視去此州如脫屣，寧當相累耶？……以不事上司。左遷河間太守。」

杜幾傳：子恕，「出爲幽州刺史，加建威將軍、使持節、護烏丸校尉。時征北將軍程喜屯薊，尚書袁侃等戒恕曰：程申伯處先帝之世，傾田園讓於青州，足下今俱仗節使，共屯一城，宜深有以待之。而恕不以爲意。至官未期，有鮮卑大人兒不由關塞，徑將數十騎詣州，州斬所從來小子一人，無表言上，喜於是劾奏恕，下廷尉。」

田豫傳：「太和末，公孫淵以遼東叛，……乃使豫以本官（汝南太守）督青州諸軍事，假節，往討之。……豫以太守督青州，青州刺史程喜內懷不服，軍事之際，多相違錯。

曹爽傳注引魏畧：「桓範……明帝時……遷征虜將軍、東中郎將、使持節、都督青徐諸軍事，治下邳。與徐州刺史鄒岐爭屋，引節欲斬岐。爲岐所奏。不直，坐免。還復爲兗州刺史……聞當轉爲冀州牧。是時，冀州統屬鎮北。而鎮北將軍呂昭才實仕進本在範後。範謂其妻仲長曰，我寧作諸卿向三公長跪耳，不能爲呂子展屈也。其妻曰，君前在東，坐欲擅斬徐州刺史，衆謂君難爲作下；今復羞爲呂屈，是復難爲作上也。範忿其言觸實，……竟稱疾不赴冀州。」

按：觀此五例，都督與刺史間不正常之關係至爲明顯。魏世史料至簡，竟有此五條詳明之記載，足見此類事情必所常有。下訖西晉，此類例證則甚少，晉書石崇傳云：「出爲征虜將軍、假節、徐州諸軍事，鎮下邳。……與徐州刺史高誕爭酒相侮。」此爲僅見之事例矣。蓋都督持節統軍，威權日隆，時間既久，其與刺史間之統隸關係逐漸定型化，故刺史常事退避以免衝突，如晉書高密王略傳：「遷安北將軍、都督青州諸軍事。略逼青州刺史程牧，牧避之，略自領州。」稽紹傳：「拜徐州刺史，時石崇爲都督，性雖驕暴，而紹將之以道，崇甚親敬之。」卽其證。

都督既漸能控制刺史，故遂亦有越權兼理民事者。如西晉之世卽多此例，略舉其次：

杜預傳：爲鎮南大將軍、都督荊州諸軍事。吳旣平，「修立泮宮，江漢懷

德，化被萬里。……又修邵信臣遺跡，激用灤清諸水以浸原田，萬餘頃，分疆刊石，使有定分，公私同利，衆庶賴之，號曰杜父。舊水道唯汎漢達江陵千數百里，北無通路，又巴丘湖，湘沅之會，表裏山川，實爲險固，荆蠻之所恃也。預乃開揚口，起夏水達巴陵千餘里，內瀉長江之險，外通零桂之漕，南土歌之。」

扶風王駿傳：「遷鎮西大將軍、使持節、都督雍涼等州諸軍事，……鎮關中。……勸督農桑，與士卒分役，已及寮佐並將帥兵士等人限四十畝，具以表聞。詔遣普下州縣，使各務農事。」

唐彬傳，爲使持節、監幽州諸軍事，領護烏丸校尉。「至鎮，訓卒利兵，廣農重稼，……兼修學校，誨誘無倦，仁惠廣被。」

劉弘傳：「爲鎮南將軍、都督荊州諸軍事。時荊部守宰多缺，弘請補選，帝從之。弘迺叙功銓德，隨才補授。爲論者所稱。乃表曰……夫慶賞刑威，非臣所專……。」

按此皆刺史之職，而都督侵之也。故西晉之末，即令都督兼領治所之州刺史，既免爭衡不睦，又收事權統一之效，實爲一大進步。

自此以後，都督例兼領治所之州刺史，本州之內，軍民刑政，由一人全權處理，自無問題。然都督常兼統兩三州，或四五州以上，且有兼統某某州之某某數郡者，則此都督被稱爲統府或督府，而所督州郡則爲屬州，彼此間亦有上下統屬之關係，茲舉數例如次：

晉書譙王承傳：「元帝……以承監湘州諸軍事、南中郎將、湘州刺史。……承行達武昌，釋戎備，見王敦。敦……聽承之鎮。時湘土荒殘，……承……傾心綏撫，甚有能名。敦恐爲已患，詐稱北伐，悉召承境內船乘。承知其奸計，分半與之。」按王敦時爲都督荆湘等州諸軍事、荊州刺史。

同書殷仲堪傳：假節、都督荊益寧三州諸軍事、荊州刺史。「時朝廷徵益州刺史郭銓，犍爲太守卞苞於坐勸銓以蜀反。仲堪斬之以聞。朝廷以仲堪事不預察，降號鷹揚將軍。」

同書劉毅傳：「都督荆寧秦雍四州(略)諸軍事、荊州刺史。……毅表荊州編

戶不盈十萬，器械索然。廣州雖凋殘，猶出丹漆之用；請依先準。於是加督交廣二州。」

宋書庾悅傳：「盧循逼京師，以爲督江州、豫州之西陽、新蔡、汝南、潁川、司州之松滋五郡諸軍事、建威將軍、江州刺史。……盧循平後，(劉)毅(時爲荊州都督)求都督江州。……以江州內地，治民爲職，不宜置軍府。……於是解悅都督將軍官，以刺史移鎮豫章。毅以親將趙惔領千兵守尋陽，建威府文武三千，悉入毅府。符攝嚴峻，數相挫辱。悅不得志，疽發背……卒。」

同書褚叔度傳：「除都督交廣二州諸軍事、建威將軍，領平越中郎將、廣州刺史。……義熙八年，盧循餘黨劉敬道窘迫，詣交州歸降。交州刺史杜慧度以事言統府。叔度以……事非欵誠，報使誅之。慧度不加防錄，敬道招集亡命攻破九真。……叔度輒貶慧度號爲奮揚將軍。惡不先上，爲有司所糾。詔原之。」

同書杜慧度傳：「義熙……七年，除使持節、督交州諸軍事、廣武將軍、交州刺史。……慧度板(長子)弘文爲鷹揚將軍、流民督護。……統府板弘文行九真太守。」

同書張茂度傳：子永。「(元嘉)二十九年，以永督冀州、青州之濟南、樂安、太原三郡諸軍事、揚威將軍、冀州刺史。督王玄謨、申坦等諸將經略河南，……爲虜所乘，死敗塗地。永及申坦並爲統府撫軍將軍蕭思話所收，繫於歷城獄。」(蕭思話傳，此時爲監徐、兗、青、冀四州、豫州之梁郡諸軍事、撫軍將軍、兗、徐二州刺史。)

南齊書蕭景先傳：「出爲持節、督司州軍州事、寧朔將軍、司州刺史，領義陽太守。是冬，虜出淮泗，……景先言於督府。驃騎豫章王遣輔國將軍中兵參軍蕭惠朗二千人助景先。」(按時在建元初，豫章王爲都督荊州刺史。)梁書世祖子方等傳：「時河東王爲湘州刺史，不受督府之令。」(按此謂不受荊州都督之命也。)

觀此諸條，屬州刺史須聽命於統府，有事須上言於統府；而統府對於屬州，有指揮督察之權，可徵聚兵戎，可調用財物，可扳授郡守，且可上言黜陟刺史。據此而言，都

## 魏晉南朝都督與都督區

督與屬州刺史間之統隸關係迥非西晉以前所可比擬矣。惟當統府反叛中央時，屬州刺史常有不聽命者，茲舉荊州都督府為例：

宋書劉秀之傳：督益寧二州諸軍事、益州刺史。時南譙王義宣都督荆湘雍梁、益寧南北秦八州諸軍事、荊州刺史。欲叛，徵兵於秀之。秀之不應，斬其使。

同書張邵傳：「分荊州立湘州，以邵為刺史。……謝晦反，遣書要邵，邵不發函，馳使皇帝。」（按晦時為都督荆湘等州諸軍事、荊州刺史。）

同書沈攸之傳：都督荆湘雍益梁寧南北秦八州諸軍事、荊州刺史。蕭道成將謀篡，攸之舉兵，「遣使要雍州刺史張敬兒、梁州刺史范伯年、司州刺史姚道和、湘州行事庾佩玉、巴陵（屬郢州）內史王文和等。敬兒文和斬其使；…伯年道和佩玉懷兩端。」

南齊書張敬兒傳：以功求為雍州刺史。「乃微動太祖（蕭道成）曰：沈攸之在荊州，公知其欲何所作，不出敬兒以防之，恐非公之利也。太祖笑而無言，乃以敬兒為持節、督雍梁二州郢司二郡軍事、雍州刺史。」

按觀此諸事例，都督對於屬州雖有統率指揮之權，但不能絕對控制如州刺史之於屬郡者，殆可斷言。

綜而觀之，魏晉南朝之世，都督與刺史之關係，及此種關係演變之過程，可略述如此：

- 一、魏世，都督統屬一州或二三州，掌軍事，州皆另置刺史掌民政，刺史雖統屬於都督，但頗富獨立性，故二者間之關係殊不正常。加以都督與治所之州刺史同駐一城，是以爭衡不睦之事時見史傳。
- 二、西晉之世，二者間之關係，形式上仍同於魏，但都督對於治所之州刺史之控制力加強，且時有侵奪刺史治民之權者。
- 三、西晉末葉，以都督兼領治所之州刺史，俾事權統一。此為一大進步之改革。
- 四、此次改革以後，都督除完全控制本州軍民刑政外，對於其他屬州亦以統府之地位有指揮督察徵調物力之權，但此等州刺史仍有半獨立之地位，都督不能完全控制。

由此言之，此一時期都督刺史之關係及其演變過程，實與清代總督巡撫之設置及其關係演變之過程如出一轍。

### 三、都 督 區

晉書地理志揚州條云：

「舊江州督荊州之竟陵郡。及何無忌爲(江州)刺史，表以竟陵去州遼遠，去江陵三百里，荊州所立綏安郡，人戶入境欲資此郡助江濱戍防，以竟陵還荊州。……安帝從之。」

又同書殷仲堪傳云：

「尙書下，以益州所統梁州三郡人丁一千番戍漢中。益州未肯承遣。仲堪乃奏之曰：夫制險分國，各有攸宜。劍閣之隘實蜀之關鍵，巴西梓橦宕渠三郡去漢中遼遠，在劍閣之內，成敗與蜀爲一，而統屬梁州；蓋定鼎中華，虛在後伏，所以分斗絕之勢，開荷載之路。自皇居南遷，守在岷邛，衿帶之形，事異曩昔。是以李勢初平，割此三郡配隸益州；將欲重複上流，爲習坎之防；事經英略，歷年數紀。梁州……盛陳事力之寡弱……論求三郡；益州以本統有定；更相牽制，莫知所從，致令巴宕二郡爲羣獵所覆。……今遠慮長規，宜保全險塞，又蠻獠熾盛，兵力寡弱，如遂……號令不一，則劍閣非我保，醜類轉難制。此乃藩杆之大機，上流之至要。昔三郡全實，正差文武三百以助梁州；今浮沒蠻獠，十不遺二，加逐食鳥散，資生未立，苟順符指，以副梁州，恐公私困弊，無以堪命；則劍閣之守無擎折之儲，號令選用，不專於益州，虛有監統之名，而無制御之用，懼非……經國之遠術。謂今正可更加梁州文武五百，合前爲一千五百；自此之外，一仍舊貫。設梁州有急，蜀當傾力救之。書奏，朝廷許焉。」

按晉世竟陵郡本屬荊州，而爲江州所督，巴西、梓橦、宕渠三郡本屬梁州，而爲益州所督，據此兩條，此四郡之號令選用專於督將，幾與本州無涉。又宋書劉粹傳云：

「永初……三年，以本號(征虜將軍)督豫司雍并四州、南豫州之梁郡弋陽馬頭三郡諸軍事、豫州刺史，領梁郡太守。」

### 魏晉南朝都督與都督區

按：梁郡屬南豫州，而爲豫州刺史所督，且領其郡守，則此郡在行政上軍事上皆統隸於豫州督區，而與本屬之州毫不相干，殆可斷言。綜此而言，督區之重要過於州域亦斷可知矣。

督區不但在行政區域上之限制性超過州區，即其固定性亦常逾於州區。如自東晉以後時或分荊州置湘州，分荆、益置巴州，皆仍屬荊州都督；分揚州置東揚州，仍屬揚州都督；分交、廣置越州，後又分置十餘州，皆仍屬廣州都督；分豫州爲南北二州，而督區則一。又如宋、齊世，竟陵郡時屬荊州，時屬郢州，隨郡時屬荊州，時屬郢州，時屬司州，然皆屬雍州都督。諸如此類情形，事例甚多，並詳後文，皆都督區反較州區爲固定之明證。

又宋書州郡志二，梁郡屬豫州。「孝武大明元年，度徐州。二年，還豫。」而孝武帝紀，大明三年「正月丁亥，割豫州梁郡屬徐州。」四年五月「乙酉，以徐州之梁郡還屬豫州。」度徐還豫各差誤兩年。今姑不論其是非。然梁郡經常屬豫州，屬徐州者纔一年，則無疑也。然據後考宋代徐州都督區，元嘉八年以後，督區可考者凡十人，除臧質外，其餘九人皆兼督豫州之梁郡。則梁郡雖恆屬豫州，但就督區而言，又恆屬徐州都督也。觀於前論督區之限制性超過州區之限制性，則梁郡與徐州督區之關係超過其與豫州之關係明矣。如此事例亦甚多，今姑舉此一事以見梗概耳。

都督之權既重，督區又常較州域爲固定，其在行政區域上之限制性復超過州域，故此一時代之都督區至爲重要，而晉宋齊隋諸書之地志記此一時期之行政區劃皆以州爲單位，而於都督區全不涉筆，殊爲缺憾；茲綜合史傳考之如次：

#### (甲) 三國與西晉

##### (A) 魏

魏置司、豫、兗、冀、幽、并、青、徐、揚、荆、雍、涼十二州，沿邊諸州皆置都督。魏志杜畿傳附子恕傳云：

「(太和中) 鎮北將軍呂昭又領冀州。乃上疏曰：……以武皇帝之節儉，府庫充實，猶不能十州擁兵。……今荆、揚、青、徐、幽、并、雍、涼緣邊諸州皆有兵矣，其所恃內充府庫，外制四夷者，惟兗、豫、司、冀而已。……冀州戶口最多，田多墾闢，……國家徵求之府，誠不當復任以兵事也。」

按：有兵即隸都督，就此一段，已可知魏世置都督之概況。而洪飴孫三國職官表與吳廷燮三國方鎮年表復詳爲輯考，惟頗有出入謬誤，今略爲銓次，約舉其員數，以明其督區如次：

(1) 雍涼都督——自魏初置都督雍涼州諸軍事一人，治長安，以備蜀。曹真、司馬懿、趙儼、夏侯玄、郭淮、陳泰、司馬望相繼爲之。甘露元年，鄧艾爲隴右都督，而司馬望尚在任。其後鍾會衛瓘相繼爲關中都督，而李充繼鄧艾爲隴右都督，則自甘露元年實分雍涼爲關中、隴右兩都督也。

(2) 荆豫都督——魏初，曹仁爲都督荆揚益州諸軍事，夏侯尚爲都督南方諸軍事領荊州刺史。此初期制未定也。太和元年，司馬懿爲都督荆豫二州諸軍事，治宛，以備蜀吳。夏侯儒繼之。正始中，王昶繼之，移治新野。甘露四年卒官。據本傳，其督區始終未變。晉書文帝紀，是年六月，「分荊州置二都督，王基鎮新野，州泰鎮襄陽。」又云：「陳騫都督豫州。」蓋同時分昶督區爲三也。

(3) 揚州都督——自魏初置揚州都督，治壽春，以備吳。曹休、滿寵、王凌、諸葛誕、毋丘儉、王基、石苞相繼爲之。而自甘露二年陳騫爲淮北都督，盧欽、司馬駿相繼爲之；是揚州督區亦分爲二也。

(4) 青徐都督——置青徐都督一人，治下邳。夏侯楙、桓範、胡質、胡遵、石苞相繼爲之。苞在甘露中。晉書文帝紀，甘露四年六月，「鍾毓都督徐州，宋鈞監青州諸軍事。」其後衛瓘繼爲徐州都督，魯芝繼爲監青州諸軍事。是青徐分區亦甘露中事也。

(5) 河北都督——置河北都督以備胡。吳質、呂昭、程喜、陳本、劉靖、許允、何曾、王父相繼爲之。吳質治信都，呂昭兼領冀州刺史，是督區兼及冀州也。自程喜都督河北幽并軍事，治薊；劉靖亦治薊；蓋督區惟幽并二州矣。

### (B) 蜀

蜀漢於緣邊諸郡並置都督：有漢中都督，以備魏；有江州都督及永安都督（一名巴東都督），以備吳；有廩降都督，先治南昌縣，徙治平夷縣，又徙味縣，以備南蠻。三國職官表已列之頗詳。蓋蜀漢地限益州，故其督區視州爲小，所督不過數郡而已。此與魏制大異。

(C) 吳

吳於緣江軍事要地置督以備魏蜀，其督區似更小。據洪飴孫三國職官表及陶元珍三國吳兵考(燕京學報第十三期)，自西而東有信陵、西陵、夷道、樂鄉、江陵、公安、巴邱、蒲圻、沔中、夏口、武昌(今鄂城)、牛州(洪引通典，在蘄春尋陽縣；略當今富池口田家鎮一帶)、柴桑、吉陽(今安徽東流北三十里有吉陽鎮吉陽磯)、皖口、濡須、蕪湖、徐陵、牛渚、京下諸督(又有中夏督，不知在今何地)。亦有稱都督者。洪陶二氏皆僅謂權輕者曰督，權重者曰都督。然考吳志陸抗傳云：

「永安二年，拜鎮軍將軍，都督西陵，自關羽(楊圖益陽有關羽瀨)至白帝。三年，假節。孫皓卽位，加鎮軍大將軍，領益州牧。建衡二年，大司馬施績卒，拜抗都督信陵、西陵、夷道、樂鄉、公安諸軍事，治樂鄉。」

據此，抗先爲西陵都督，後爲都督，治樂鄉，其都督區全同，惟治所有遷徙耳。抗傳下文又述抗所統有西陵督步闡、江陵督張咸、公安督孫遵、水軍督留虛、宜都太守雷譚等，是都督統轄數督之明證，不僅權位視督爲重而已也。

按樂鄉都督始於朱然。吳志朱然傳云：

「蒙卒，權假然節，鎮江陵。……諸葛瑾子融，步隲子協，雖各襲任，權特復使然總爲大督。……赤烏十二年卒。」

據步隲傳，協爲西陵督；據諸葛瑾傳，融爲公安督；則然爲大督，除督江陵外，又兼統西陵公安兩督也。大督卽都督之謂。然卒，子績繼之。然傳附續傳云：

「然卒，績襲業，拜平魏將軍、樂鄉督。明年，魏征南將軍王昶率衆攻江陵城，不克而退。績與奮威將軍諸葛融(時爲公安督)書曰：昶遠來疲困，……力屈而走，此天助也。今追之，力少。可引兵相繼，……宜同斷金之義。融答許續。續便引兵及昶於紀南，紀南去城三十里，續先戰勝，而融不進，續後失利。」

按：吳之督將例皆世襲。續繼然爲樂鄉督，而江陵實無督，然傳所謂「鎮江陵」者，以樂鄉在江陵對江不遠，屯樂鄉，卽以鎮江陵也。續傳又云：

「建興……二年，……假節。太平二年，拜驃騎將軍。……永安初，遷上大將軍，都護督自巴丘上迄西陵。元興元年，就拜左大司馬。」

據此，然以樂鄉督兼統西陵、公安兩督，續先僅爲樂鄉督，後則都護督自巴丘至西陵，視然都督區爲擴大矣。按：朱然本姓施，至續復姓，則陸抗傳繼施續爲樂鄉都督者，即此朱續也。

西陵都督始於陸遜，然遜傳不云督。步隲繼之，本傳云：

「權稱尊號，拜驃騎將軍，……是歲都督西陵，代陸遜撫二境。……赤烏九年，代陸遜爲丞相，……在西陵二十年，……。十一年卒，子協嗣，統隲所領，加撫軍將軍。協卒，……弟闡繼業爲西陵督，加昭武將軍。」

遜隲都督區包括若干地方不可知，然就二人地位事業而言，其轄區決不局限於西陵一地，殆可斷言。隲之後，可考見於史傳之都督即陸抗矣。據前引抗傳，先爲西陵都督，後爲樂鄉都督，督區則未變，其後西陵僅置督，無都督。然晉書武帝紀云：

「太康元年……二月……庚申，又剋西陵，殺西陵都督鎮軍將軍留憲、征南將軍成璩，西陵監鄭廣。壬戌，濬又克夷道樂鄉城，殺夷道監陸晏、水軍都督陸景。甲戌，杜預剋江陵，斬吳江陵督五延（吳志孫皓傳五作伍）。」

則吳將亡之際，復置都督於西陵，而江陵僅置督矣。而通鑑晉紀三記此事云：

「大康元年……二月……庚申，濬克西陵，殺吳都督留憲等。壬戌，克荆門夷道二城，殺夷道監陸晏。杜預遣牙門周旨等帥奇兵八百，汎舟夜渡江，襲樂鄉。吳都督孫歆懼，與江陵督任延書曰，北來諸軍乃飛渡江也。旨等伏兵樂鄉城外，歆遣兵出拒王濬，大敗而還，旨等發伏兵隨歆軍而入，歆不覺，直至帳下，虜歆而還。」

按通鑑此段係據王濬杜預兩傳，與武紀小異。又吳書孫賁傳注引吳歷，孫歆爲樂鄉督，非都督。然吳末江陵樂鄉並有督將，如陸抗時，則斷可知矣。

綜上所論，大抵自巴丘洞庭以上西接蜀境爲一都督區，其都督或治西陵，或治樂鄉（或江陵）。若孫歆都督爲可信，則末際此都督區又以西陵樂鄉爲中心分而爲二矣。

又吳志陸遜傳云：

「還西陵，黃龍元年，拜上大將軍，右都護。是歲，權東巡建業，留太子皇子及尚書九官，徵遜輔太子，並掌荊州及豫章三郡（蓋即後文討擊豫章鄱陽廬陵三郡賊之三郡）。……赤烏七年，代顧雍爲丞相。其州牧都護領武昌事

### 魏晉南朝都督與都督區

如故。」

同書呂岱傳云：

「及陸遜卒，諸葛恪代遜，權乃分武昌爲兩部，岱督右部，自武昌上至蒲圻。遷上大將軍。拜子凱副軍校尉，監兵蒲圻。孫亮卽位，拜大司馬。」

按其後任右部督者有陸凱，見本傳。任左部督者，有范慎，後遷太尉，見孫登傳注引吳錄；又有薛瑩，見本傳；徐平，見虞翻傳注引會稽典錄。又按陸遜所管甚廣，自不待言。卽分左右兩部，右部督區自武昌上至蒲圻，當包括夏口督，或且包括沔中督；而左部督區當自武昌下迄半州、柴桑兩督。由此言之，武昌上下地區，諸督之上亦有統督者，惟不以「都督」名耳。然晉書陶璜傳：「皓以璜爲使持節、都督交州諸軍事、前將軍、交州牧。……徵璜爲武昌都督。」吳志虞翻傳注引會稽典錄，虞昺，「晉軍來伐，遣昺持節都督武昌已上諸軍事。」是末葉亦以「都督」名矣。

又吳志陸凱傳：

「五鳳二年，……拜巴丘督、偏將軍，封都鄉侯。轉爲武昌右部督。……孫皓立，遷鎮西大將軍，都督巴丘，領荊州牧，進封嘉興侯，……遷右丞相。」

據此條記事，亦可知都督之異於督者，不但位尊權重；且由武昌右部遷來，並領荊州牧，其督區必甚廣，殆可斷言。

又吳志賀齊傳云：

「拜安東將軍，封山陰侯，出鎮江上，督扶州以上至皖。黃武初，魏使曹休來伐，齊以道遠後至，因住新市爲拒。會洞口諸軍遭風流溺，所亡中分，將士失色，賴齊未濟，偏軍獨全，諸將倚以爲勢。……軍還，遷後將軍假節，領徐州牧。」

同書呂範傳云：

「權破羽，還都武昌，拜範建威將軍，封宛陵侯，領丹陽太守，治建業；督扶州以下至海。……曹休……來伐，範督徐盛全琮孫韶等以舟師拒休等洞口，遷前將軍，假節。……軍還，拜揚州牧。」

據此兩條記載，吳初，呂範以丹陽太守督扶州以下至海，領揚州牧；同時，賀齊督扶州以上至皖，領徐州牧。扶州在今何地雖待考（必在建業濡須口間殆可斷言），或者卽洞

口牛渚上下歟？），然大江下流亦分上下兩大督區，此明證也。

以上皆沿江諸都督區也。至於沿海一帶亦置督。具舉如次：

吳志孫破虜吳夫人傳注引吳書云：

「權征荊州，拜（吳）奮吳郡都督，以鎮東方。」

按此爲沿海置督之最北者。

又吳志孫皓傳云：

「鳳凰三年，……會稽妖言，章安侯奮當爲天子，臨海太守奚熙與會稽太守郭誕書，非論國政。誕但白熙書，不白妖言；送付建安作船。遣三郡督何植收熙。」

按此三郡督之督區，臨海必其一。又按：吳世，浙東至閩僅會稽、東陽、臨海、建安四郡，東陽位處內陸；餘三郡濱海，而臨海郡居中。吳制，惟緣邊置督，此所督三郡，當不數東陽，而數會稽、建安。則北接吳郡，南連廣交兩督矣。

又吳志孫皓傳云：

「天紀……三年夏，郭馬反，……攻殺廣州督虞授。馬自號都督交廣二州諸軍事、安南將軍。（殷）興，廣州刺史。」

晉書滕脩傳云：

「廣州部曲督郭馬等爲亂，（孫）皓以脩宿有威惠，爲嶺表所伏，以爲使持節、都督廣州軍事、鎮南將軍、廣州牧，以討之。未慰，而王師伐吳，……皓已降，……與廣州刺史閻豐……各送印綬。詔以脩爲安南將軍，廣州牧、持節、都督如故。」

據此兩條，吳末廣州亦置督。惟晉書滕脩傳，脩在吳世任職，官銜即爲「使持節都督廣州軍事」與魏晉制同，而與吳志所記諸將只爲「督」或「都督」者不同。按：孫皓傳書事，虞授官名「廣州督」，此吳志常例也；而郭馬自號「都督交廣二州諸軍事」，與刺史各一人，此純魏晉之制，極可能與晉取得聯絡（觀晉書陶璜傳書呂興事，即爲佳例），故名號不同，非吳志簡書虞授官名，而全書郭馬僭偽官名也。意者滕脩官名亦只當爲廣州都督、假節、領廣州牧；晉書所書乃以晉制例書之耳。

又晉書陶璜傳云：

### 魏晉南朝都督與都督區

「南中監軍霍弋又遣犍爲揚稷……等自蜀出交趾，破吳軍于古城，斬大都督脩則、交州刺史劉俊。吳遣虞汜爲監軍，薛珝爲威南將軍、大都督，璜爲蒼梧太守。……珝……以璜領交州，爲前部督。……皓以璜爲使持節、都督交州諸軍事、前將軍、交州牧。……徵璜爲武昌都督；以合浦太守脩允代之。」

按：曰大都督，曰使持節都督交州諸軍事，皆都督也。

據上所考，吳緣海一帶自吳郡至交趾，有吳郡都督，有會稽臨海建安三郡督，有廣州都督，有交州都督，凡爲四都督區。

### (D) 西晉

西晉承魏、蜀、吳，有司、豫、兗、冀、青、徐、幽、并、雍、涼、益、荆、揚、交、廣十五州。又分益置梁（武帝泰始三年）、寧（泰始七年），分雍涼置秦（泰始五年），分幽置平（咸寧二年），共凡十九州。

通鑑晉紀二，咸寧五年，傳咸上書曰：「舊都督有四，今並監軍乃益於十。」胡三省注云：

「魏初置都督諸軍，東南以備吳，西以備蜀，北以備胡，隨其資望輕重而加以征、鎮、安、平之號，有四而已。其後增置，有都督鄴城守諸軍，都督秦雍涼諸軍，都督梁益諸軍，都督荊州諸軍，都督揚州諸軍，都督徐州諸軍，都督淮北諸軍，都督豫州諸軍，都督幽州諸軍，都督并州諸軍，凡十；其資輕者爲監軍。」

按平吳以後，此制不廢。吳廷燮晉方鎮年表載之頗詳。據此表，司兗二州不置督，并州及梁益偶置督，交廣二州常以刺史加都督，寧州蓋亦然，皆非經制；其經常置督者凡八：

- (1) 豫州都督——都督豫州諸軍事，鎮許昌。
- (2) 鄴城督——督鄴城守諸軍事，鎮鄴城；末葉始有都督冀州之號，仍鎮鄴。
- (3) 幽州都督——都督幽州諸軍事，兼督平州，鎮薊。
- (4) 關中都督——都督關中（或曰關西，或曰雍涼）諸軍事，統雍涼秦三州，鎮長安。
- (5) 沔北都督——都督沔北諸軍事，鎮宛城。

(6) 荆州都督——都督荊州諸軍事，鎮襄陽。

(7) 青徐都督——都督青徐諸軍事，鎮下邳。

(8) 揚州都督——都督揚州諸軍事，鎮壽春。

惠帝分荆揚置江州，常屬揚州都督區；懷帝分荆廣置湘州，常屬荊州都督區。則州分爲二十一，而督區則未增置也。

## (乙) 東 晉

東晉仍分區置都督，惟承西晉末葉之制，以刺史兼充，不別用人。吳廷燮東晉方鎮年表以州刺史爲單位，致都督區劃不顯。然晉書紀傳所載有關都督區之材料多已輯入表中。今即利用吳表所輯之材料，參之史傳，述東晉都督區如次：

### (1) 揚州都督區

揚州都督區因人而異，最無定型。比較常見者爲兼督豫州，或加江州，或加兗州，如何充爲都督揚豫二州諸軍事、揚州刺史(康帝紀)，桓沖爲都督揚豫江三州諸軍事、揚州刺史(孝武紀)，庾冰爲都督揚豫兗三州諸軍事、揚州刺史(本傳)；又如殷浩都督揚豫徐兗青五州諸軍、揚州刺史(穆帝紀)。然其地皆不出西晉揚州之域。至如謝安爲大都督揚江荆司豫徐兗青冀幽并梁益雍涼十五州諸軍事、揚州刺史(孝武帝紀)，司馬元顯爲都督揚豫徐兗青幽冀并荆江司雍涼益交廣十六州諸軍事、揚州刺史(安帝紀)，是無異都督中外諸軍事矣。

### (2) 荆州都督區

西晉末，荊州都督已偶統湘、交、廣、益、寧諸州。如永嘉三年，山簡都督荆湘交廣四州諸軍事，尋加督益寧軍事(懷帝紀)，是也。東晉，此區都督以荊州刺史兼充，鎮江陵。吳廷燮東晉方鎮年表輯荊州刺史兼督諸州材料最詳，茲錄其自陶侃以下十四人之督區如次：

陶侃：都督荆雍梁交廣益寧七州諸軍事、荊州刺史。(咸和四年已廢湘州併入荊州。)後加督江州，並領刺史。(成帝紀、本傳)。

庾亮：都督江荆豫益梁雍六州諸軍事、江豫荆三州刺史。(通鑑)。

庾翼：都督荆江司雍梁益六州諸軍事、荊州刺史。(建康實錄、通鑑。)後又加督寧州(穆帝紀)。

## 魏晉南朝都督與都督區

桓溫：都督荆司雍梁益寧六州諸軍事、荊州刺史。（穆帝紀）。

桓豁：都督荆梁益寧交廣六州諸軍事、荊州刺史。（孝武紀）。

桓沖：都督荆江梁益寧交廣七州諸軍事、荊州刺史。（孝武紀）。

桓石民：都督荆益寧三州諸軍事、荊州刺史。（孝武紀）。

王忱：都督荆益寧三州諸軍事、荊州刺史。（孝武紀、通鑑）。

殷仲堪：都督荆益梁三州諸軍事、荊州刺史（孝武紀）。[傳作荆益寧三州]。

桓玄：都督荆江司雍秦梁益寧八州諸軍事、荊州刺史。（本傳）。

司馬休之：監荆益梁寧秦雍六州諸軍事、荊州刺史。（通鑑）。

劉道規：都督荆益寧秦梁雍、司州之河南諸軍事、荊州刺史。（宋書本傳）。

劉道憐：都督荆湘（分荆廣置，旋省）益秦寧梁雍七州諸軍事、荊州刺史。

（宋書本傳）。

劉義隆：都督荆益寧雍梁秦六州、豫州之河南廣平、揚州之義成松滋四郡諸軍事、荊州刺史。（宋書文帝紀）。

據此而言，荊州都督區通常統轄荆益寧雍梁五州，爲上流重鎮。時或兼統江州，時或兼統交廣。則東晉實土大半在其隸督之下。

### （3）江州都督區

江州通常多自成一督區。雖時或統隸於揚州都督，時或統隸於荊州都督；然非經制。江州都督始僅督本州。建元中，庾冰都督江荆寧益梁交廣七州、豫州之四郡軍事，領江州刺史（本傳），是爲江州都督兼統零郡之始。其後都督他州之零郡者常見紀傳，如：

謝尚：督豫州四郡，領江州刺史。（本傳）。

桓沖：興寧三年，監江州、荊州之江夏隨郡、豫州之汝南西陽新蔡潁川六郡諸軍事、江州刺史。（哀帝紀、本傳）。

桓嗣：督荊州之三郡、豫州之四郡軍事、江州刺史。（本傳）。

桓伊：都督江州、荊州十郡、豫州四郡軍事、江州刺史。（本傳）。

何無忌：都督江荆二州（當作江州、荊州）江夏隨義陽綏安、豫州西陽新蔡汝南潁川八郡軍事、江州刺史。（本傳）。

庾悅：督江州、豫州之西陽新蔡汝南潁川、司州之松滋五郡軍事〔當與孟懷玉同〕、江州刺史。(宋書本傳)。

孟懷玉：爲江州刺史。尋督江州、豫州之西陽新蔡汝南潁川、司州之〔錢大昕曰「之」下脫「恆農揚州之」五字〕松滋六郡諸軍事。(宋書本傳)。

據此而言，江州都督區，除本州外，常包括荊州之漢水以東諸郡及豫州之西南諸郡。溫嶠爲都督江州刺史，鎮武昌；上言宜鎮尋陽。朝廷未許(本傳)。其後陶侃庾亮皆都督荆江諸州領二州刺史，鎮武昌(成帝紀及本傳)。庾冰亦以荆江諸州都督江州刺史，居武昌(本傳)。太元中，桓伊爲都督江州刺史，請移州還鎮豫章，詔令移州尋陽(本傳)。其後多鎮尋陽。

#### (4) 徐州都督區

徐州刺史多加都督。大體言之，其督區爲徐青兗三州。如蔡謨(本傳)、桓溫(康帝紀)、褚裒(本傳)、荀羨(本傳，參穆帝紀)、庾希(哀帝紀)、王坦之(本傳)、謝玄(本傳)、劉道憐(宋書本傳)皆是也。但加督揚州之晉陵者亦甚多。如褚裒、劉道憐除督三州外，又督揚州之晉陵；蔡謨除督此三州外，又督揚州之晉陵、豫州之沛郡；謝玄除督此三州外，又督揚州之晉陵、幽州之燕國；是也。又何充都督徐州、揚州之晉陵諸軍事(本傳)，郗愔都督徐兗青幽四州、揚州之晉陵諸軍事(慶帝紀、本傳)，亦其例。此諸州郡惟徐州及揚州之晉陵郡爲實土。其鎮地，先爲淮陰(即下邳，如劉隗、王邃)，繼鎮廣陵(如郗鑒)，遷鎮京口(如郗鑒、何充)，後復進鎮下邳(如荀羨、庾希)，又遷鎮廣陵(如王坦之)，終鎮京口(如桓沖、劉道憐)。爲京師東北之重鎮。

#### (5) 豫州都督區

豫州舊置於揚州，故所督皆揚州之郡。如庾亮都督豫州、揚州之江西、宣城諸軍事、豫州刺史(成帝紀、本傳)；庾憚以豫州刺史監宣城廬江歷陽安豐四郡諸軍事(本傳)；謝尚督揚州之六郡諸軍事、豫州刺史(本傳、穆帝紀)；桓石度監豫州、揚州五郡諸軍事、豫州刺史(本傳)；朱序爲揚州、豫州(揚豫當乙)五郡諸軍事、豫州刺史(本傳)；劉毅都督豫州、揚州之淮南歷陽廬江安豐(脫堂邑?)五郡諸軍事、豫州刺史，後又兼都督宣城(本傳)；劉道規都督豫江二州、揚州之宣城淮南廬江歷陽安豐堂邑六郡諸軍事、豫州刺史(宋書本傳)；諸葛長民都督豫州、揚州之六郡諸軍事、豫州刺

### 魏晉南朝都督與都督區

史，領淮南太守（本傳）；皆其例。是其督區爲今安徽省中南部。本都督爲京師西北之重鎮。初多鎮蕪湖（成帝紀、庾憲傳、晉書地理志）。永和二年，謝尚鎮蕪湖，四年進壽春，九年還鎮歷陽，十一年又進鎮馬頭。（宋書州郡志。）其後謝萬（本傳）、袁真（哀帝紀）復鎮壽陽。寧康元年，移鎮姑孰（晉書地理志）。太元十年，朱序戍馬頭；十二年，桓石虔戍歷陽。（宋書州郡志。）其後庾準庾楷兄弟及刁逵、魏詠之皆鎮歷陽（各本傳）。義熙二年，劉毅戍姑孰（宋書州郡志）。諸葛長民領淮南太守，是又鎮壽陽（本傳）。義熙十三年，劉義慶亦鎮壽陽（宋書州郡志）。大抵鎮歷陽時間最多，進則馬頭、壽陽，退則姑孰、蕪湖也。

### （6）會稽都督區

會稽爲東晉人口最殷之一郡，任其職者地位不在大州刺史之下，且常都督浙東五郡，爲一督區。王舒傳，爲會稽內史，會蘇峻作逆，「陶侃立行臺，上舒監浙東五郡軍事。」是爲都督五郡見於史傳之始。時在成帝咸和中。王羲之傳，爲會稽內史，「求分會稽爲越州。」時在永和中。事雖未成，但浙東五郡有獨立爲一區之勢，其來舊矣。郗愔傳，爲會稽內史。「簡文帝踐祚，就加鎮軍、都督浙東五郡軍事。」自後以會稽內史都督五郡，常見紀傳。如王蘊（本傳）、王薈（本傳）、謝琰（通鑑隆安三年）、劉牢之（通鑑次年）、孔季恭（宋書本傳）是也。又司馬休之傳，爲會稽內史。盧循作逆，加督浙東五郡軍事。蓋或加或不加也。按浙東五郡卽會稽臨海東陽永嘉新安，詳後宋齊節。又按五郡既皆屬揚州，故此一都督自統隸於揚州都督。

### （7）沔中都督區

沔中諸郡常自爲一都督區，晉書所載材料多已輯入吳表雍梁兩刺史卷，茲檢其有關督區者以時次條錄於後：

甘卓傳：爲安南將軍、梁州刺史、督沔北諸軍事，鎮襄陽。

王敦傳：以義陽太守任憎督沔北諸軍事、南中郎將。

周撫傳：督沔北諸軍事、南中郎將，鎮沔中。後再爲監沔北諸軍事、南中郎將，鎮襄陽。

桓宣傳：監沔中軍事、南中郎將、江夏相。後進鎮襄陽。庾亮謀北伐，以宣爲都督沔北前鋒征討諸軍事、司州刺史，仍鎮襄陽。

庾翼傳：以子方之爲義成太守，代宣鎮襄陽。

庾翼傳：以劉惔代方之監沔中軍事，領義成太守。

袁喬傳：督沔中諸戍，江夏隨義陽三郡事、江夏相。

桓沖傳：督荊州之南陽襄陽新野義陽順陽、雍州之京兆、揚州之義成七郡軍事、寧朔將軍、義成新野二郡太守，鎮襄陽。

桓豁傳：督沔中七郡軍事、新野義成二郡太守。

同傳：爲都督荊州刺史。張天錫陷沒，豁表以梁州刺史毛憲祖(穆之)監沔北軍事，兗州刺史朱序爲南中郎將監沔中軍事，鎮襄陽，以固北鄙。(本紀，序亦爲梁州刺史。)

毛穆之傳：督揚州之義成、荊州五郡、雍州之京兆軍事、襄陽義成河南三郡太守。又進領梁州刺史。

孝武紀：太元十三年，以朱序都督雍梁沔中九郡諸軍事、雍州刺史。

郗恢傳：梁秦雍司荆揚并等州軍事、雍州刺史，鎮襄陽。(按此所謂諸州皆指某州之某郡而言。)

楊佺期傳：都督梁雍秦三州諸軍事、雍州刺史。

桓玄傳：以刁暢督八郡，鎮襄陽。

據此觀之，此一督區以襄陽爲中心，包括南陽、新野、義陽、義成等七郡或八九郡，多鎮襄陽。以其位於沔水(漢水)中流，故稱沔中，又以其地區在沔水以北者遠較以南爲多，故一稱沔北。且有沔北沔中分置兩督者。其職或以郡守兼充，或以雍梁刺史兼充，無定制。觀其地區與兼充都督者，自統隸於荊州都督無疑，而前引桓豁傳，尤爲明證。

#### (8). 益州都督區

東晉之初，益州爲李成所據，晉置巴東監軍，領益州刺史，以資攻守。周撫傳，爲監巴東諸軍事、益州刺史。尋加督寧州諸軍事。永和初，桓溫征蜀，進督梁州之漢中巴西梓檍陰平四郡軍事，鎮彭模。(既滅成，當遷鎮成都)。在州三十餘年卒。子楚代監梁益二州、益州刺史。卒官。復以督寧州諸軍事、寧州刺史周仲孫監益州梁州之三郡軍事、益州刺史。仲孫，撫弟光之子也。而廢帝紀，興寧三年，周撫卒，書銜爲

### 魏晉南朝都督與都督區

都督益寧二州、益州刺史。太和六年，楚卒，書銜爲監益寧二州諸軍事、益州刺史。與傅小異，蓋周氏三世在益州四十餘年，其督區爲益寧二州及梁州之三四郡。殷仲堪傳云：

「尚書下以益州所統梁州三郡人丁一千番戍漢中，益州未肯承遣。仲堪乃奏之曰：夫制險分國，各有攸宜，劍閣之隘，實蜀之關鍵，巴西梓橦宕渠三郡去漢中遼遠，在劍閣之內，成敗與蜀爲一，而統屬梁州。蓋定鼎中華，慮在後伏，所以分斗絕之勢，開荷戟之路。自皇居南遷，守在岷邛，衿帶之形，事異曩昔，是以李勢初平，割此三郡配隸益州，將欲重複上流，爲習坎之防，事經英略，歷年數紀……。」

按時在太元末，是尤自桓溫取蜀以來益州兼督梁州之巴西梓橦宕渠三郡之證，且蓋即此終東晉世。又按周氏三世都督益寧梁諸州郡，自成帝至孝武帝三四十年中，歷任荊州都督，庾亮庾翼兼督梁益，桓溫桓豁兼督梁益寧，是周氏三世始終在荊州都督統轄下。自後荊州都督幾例督益寧或梁益，則此一督區與荆督之關係於此可見。

### (9) 廣州都督區

交廣亦常爲一督區，以廣州刺史兼充都督。如陶侃傳，爲廣州刺史，加都督交州諸軍事。阮孚傳，都督交廣寧三州諸軍事、廣州刺史。鄧嶽傳，督交廣二州諸軍事、平越中郎將、廣州刺史；咸康三年，加督寧州。弟逸繼之。是也。時皆在東晉初年。據吳表所輯材料，此後三十餘年間，未嘗見有督交州者。太元以後，都督交廣二州諸軍、平越中郎將、廣州刺史始又常見紀傳。如孔汪（孔愉傳）、桓玄（本傳）、吳隱之（安帝紀、本傳）、褚裕之（宋書褚叔度傳）、王鎮之（宋書本傳）、張裕（宋書張茂傳）皆然。按鄧嶽爲都督交廣寧三州時，陶侃正在都督荆江雍梁交廣益寧八州諸軍事任。則此區統於荊州都督也。然自孔汪以下，都督荊州者皆不及交廣，則此交廣都督又獨立爲區矣。



東晉都督區略如上述。約而言之，揚州都督以揚州刺史兼任，其督區最無定域，或僅都督本州，或東兼徐、兗，或西兼豫、江，或都督全國諸州，或都督中外諸軍事。督區雖伸縮無常，然其鎮衛京師則一也。以京師爲中心，東北重鎮有徐州都督，

以徐州刺史兼任，督徐兗青三州及揚州之晉陵，鎮廣陵。西北重鎮有豫州都督，以豫州刺史兼任，督豫州及揚州之宣城、廬江、歷陽、安豐、淮南諸郡，鎮歷陽。徐豫兩都督東西夾輔以臨北方之強敵，時或進鎮下邳與壽陽，時或退戍京口與姑孰，與時進退，總以外拒強敵，內衛京師爲目的。此二督區通常皆獨立，直隸中央，亦偶統隸於揚州都督。浙東沿海一帶，自晉室東渡以後，人口漸殷，是爲京師之後屏，而距京師懸遠，故置會稽都督，以會稽內史兼任，督會稽、臨海、東陽、永嘉、新安五郡。此皆揚州屬郡，故此都督自統隸於揚州。荊州爲上流重鎮，故置都督，以荊州刺史兼任，督荆雍梁益寧諸州，時或兼統江州，時或兼統交廣，其督區視其他督區爲特大。在此督區內，又置沔中都督，督沔中諸郡（襄陽、南陽、新野、義陽、順陽、義成等），常以郡守或雍梁刺史兼任，鎮襄陽，以爲荊州之前衛；又置益州都督，以益州刺史兼任，督益、寧二州及梁州之巴西、梓橦、宕渠三郡，鎮成都，以爲荊州之西翼。至於交廣，遠懸南鄙，蠻夷雜處，故別置都督，以廣州刺史兼任，督二州，鎮番禺；先統屬於荊州都督，後獨立爲職，直隸中央。江州北當長江中流，南盡今贛閩全境，地屬要衝，統轄遼闊，爲中流重鎮，故亦置都督，以刺史兼任，督江州及荊州之漢水以東江夏隨等郡，先鎮武昌，徙鎮尋陽。

自晉室南渡，殷富之區惟長江一帶狹長之地，而北有強敵壓境，故軍政局勢回復孫吳時代，形成揚荊兩大中心，對外固有東西併力之利，對內亦有東西抗衡之害，屢次政變，多由於此。江州爲中流重鎮，東西均勢之轉變，常繫於此州。東晉之初，王敦以荊江兩州凌逼中央。永和中，殷浩都督揚、豫、徐、兗、青五州，桓溫都督荆、司、雍、益、梁、寧六州，均不及江州，而維持均勢。永和末，桓雲爲江州，均勢遂破，終至桓溫東下，領揚州，專國政。及桓溫與荊州都督桓豁相繼卒，桓沖不能支持全局，迫而退處荊州，都督荆、江、梁、寧、益、交、廣七州，而揚州則爲謝安所代，又成東西抗衡之勢。其時，江州爲冲督區，安以中央執政地位欲用刺史，冲怒，求自領（事見冲傳）。此爲東西爭江州控制權之顯例者一。隆安中，司馬道子、司馬元顯相繼領揚州，執國政，而桓玄爲荊州都督。玄傳，「表求領荆江二州。詔以玄都督荆、司、雍、秦、梁、益、寧七州、後將軍、荊州刺史。……玄上疏固爭江州，於是進督八州及揚豫八郡（當即江州都督所常領之郡），復領江州刺史。」此爲東西爭江州

控制權之顯例者二。玄既兼據荆江，遂成東下篡國之勢。義熙中，劉裕領揚州，執國政；而宗室司馬休之爲都督荆、雍、梁、秦、寧、益六州軍事、荊州刺史。宋書孟懷玉傳，義熙八年，遷江州刺史，都督江州、豫州之西陽、新蔡、汝南、潁川、司州之松滋六郡諸軍事。「時荊州刺史司馬休之居上流，故授懷玉此任以防之。」此爲東西爭江州控制權之顯例者三。裕既兼據揚、江，亦不旋踵而取荊州。故荆、揚爭衡得江州者恆勝，此殆終南朝不變之局也。

### (丙) 宋 齊

晉末，劉裕北伐，拓地甚廣。及篡位稱宋，雖屢爲北魏所蠶食，但秦嶺以南全部土地及黃河以南大半州郡均在宋室統治範圍內。分置諸州，有揚、南徐(徐州改)、徐(晉末分徐州淮北地爲北徐，宋初但曰徐)、南兗(文帝分南徐之江北地置，治廣陵)、兗、南豫、豫、江、青、冀、司、荆、湘(自晉以來屢置屢廢)、雍(原僑州郡，文帝元嘉二十六年割荊州五郡置，治襄陽)、梁、秦、益、寧、廣、交，凡二十州。孝武帝分荆、湘、江、豫置郢州；明帝分交、廣置越州；孝武又嘗分揚州置東揚州，旋仍廢併揚州；故終宋世爲二十二州。齊承之，惟分荆、益置巴州；凡二十三州。

宋書、齊書本紀詳書各州刺史，但不書都督區域；至列傳始詳書之。吳廷燮撰宋齊梁陳方鎮年表，惟取本紀，鮮採列傳，故詳閱吳表仍不能悉其督區。茲更採列傳考之如次：

#### (1) 揚州都督區

宋初，廬陵王、義真及徐羨之爲揚州刺史，不加都督。文帝元嘉三年，王宏以錄尚書事領揚州刺史，亦不加都督。彭城王、義康傳，元嘉六年，由荊州入爲司徒錄尚書事，都督揚、南徐、兗三州諸軍事，領南徐州刺史；與王宏共輔政。九年，弘卒，改領揚州刺史。是爲宋代揚州都督之始。江夏王、義恭傳，元嘉十七年，繼義康爲司徒、錄尚書、都督揚、南徐、兗三州諸軍事；明年解督南兗。按其時始興王、廬陵王等相繼爲揚州刺史，故義恭僅爲都督，不領州。同傳，二十九年，領南徐州刺史，仍鎮東府、錄尚書事。孝武帝卽位，爲待中、都督揚、南徐二州諸軍事、太尉、錄尚書事、南徐、徐二州刺史，鎮京口。孝建二年，徵爲揚州刺史。旋解揚州刺史以授西陽王、子、尚。

地志，大明三年，罷揚州爲王畿；八年，復爲揚州。豫章王子尚傳，此時，徵爲都督揚南徐二州諸軍事；而據本紀，子尚實領刺史。又據本紀，此後建安王休仁、桂陽王休範、王景文、安成王準、晉熙王燮、蕭道成相繼爲揚州刺史。按：休仁傳，爲侍中、都督揚南徐二州諸軍事、司徒、尚書令、揚州刺史。順帝紀，準爲揚州刺史，後加都督揚南豫二州諸軍事。晉熙王昶傳，燮爲都督揚南徐二州諸軍事、揚州刺史；及齊王爲南徐州，燮解督南徐，進督南豫江州諸軍事。南齊書高帝紀，道成爲都督中外諸軍事、揚州牧。而休範、景文則不加都督。據此言之，宋代揚州都督，大體督揚及南徐二州，偶不督南徐而督南豫，且偶有都督不領刺史，刺史不加都督者，足見制度尚未定型化。

至齊，則不然。據南齊書本紀，豫章王嶷、臨川王映，竟陵王子良，新安王昭文（海陵王）、西昌侯鸞（明帝）、始安王遙光、晉安王寶義及蕭衍（梁武帝）相繼爲揚州刺史，考之各人列傳本紀，皆爲都督揚南徐二州諸軍事、揚州刺史；是督區完全確定矣。

## (2) 南徐都督區

劉宋時代，南徐州刺史均見於宋書本紀，茲據各人列傳明其督區如次：

長沙王道憐（晉末——宋永初三）——都督徐青三州、揚州之晉陵（即後日南徐南兗徐青五州地）諸軍事、徐兗二州刺史。

彭城王義康（永初三——元嘉三）——都督南徐兗二州、揚州之晉陵諸軍事、南徐州刺史。

江夏王義恭（元嘉三——六）——監州郡刺史同上。

彭城王義康（元嘉六——九）——都督州郡刺史同上。

衡陽王義季（元嘉九——一六）——都督南徐州刺史。

南譙王義宣（元嘉一六——二一）——都督刺史同上。

廣陵王誕（元嘉二一——二六）——南徐州刺史。

始興王濬（元嘉二六——二九）——都督南徐兗二州諸軍事、南徐兗二州刺史。（二十八年解南兗州刺史。）

江夏王義恭（元嘉二九——孝建二）——都督揚南徐二州諸軍事、南徐刺史。

## 魏晉南朝都督與都督區

竟陵王誕(孝建二——大明元)——都督南徐兗二州諸軍事、南徐刺史。

劉延孫(大明元——五)——南徐州刺史。

新安王子鸞(大明五——泰始元)——南徐刺史，加都督。

永嘉王子仁(泰始元)——南徐刺史。

桂陽王休範(泰始元——五)——都督南徐徐南兗兗四州諸軍事、南徐刺史。

晉平王休佑(泰始六——七)——都督南徐南兗徐兗青冀六州諸軍事、南徐刺史。

巴陵王休若(泰始七)——都督南徐南兗徐兗青冀六州諸軍事、南徐刺史。

劉秉(泰始七——泰豫元)——都督南徐徐兗豫青冀六州諸軍事、南徐刺史。

建平王景素(泰豫元——元徽四)——都督南徐南兗徐兗青冀六州諸軍事、南徐刺史。「齊王(蕭道成)爲南兗州，景素解都督。」

武陵王贊(元徽五——昇明元)——督南徐兗青冀(脫?)五州諸軍事、南徐刺史。

蕭道成(昇明元——宋亡)——都督南徐南兗徐兗青冀六州諸軍事、南徐刺史。

按：宋世南徐都督以刺史兼充，鎮京口。據上列所引材料，宋初都督區爲徐兗二州及揚州之晉陵；此與晉末略同。元嘉九年至末年，南徐刺史似僅督本州。其後或加督南兗，則與宋初實同。至於義恭加督揚州，則特例也。至明帝泰始以後，絕大多數都督南徐、南兗、徐、兗、青、冀六州，幾成定型矣。與前揚州都督比照觀之，宋初，揚州不置都督，故南徐都督獨立爲區，不統屬於揚州。及揚州置都督，例多統督南徐，然南徐都督又兼統南兗徐兗青冀諸州，則非揚州都督所統，其時制度歧駁如此。

南齊書本紀，齊初，長沙王晃、南郡王長懋(文惠太子)、竟陵王子良、桂陽王鑠相繼爲南徐刺史。檢各人本傳，自晃至子良皆都督南徐、(南)兗二州。而鑠傳云：「永明二年，出爲南徐州刺史，鎮京口。歷代鎮府，鑠出蕃，始省軍府。」其後歷任刺史，例不加都督。惟明帝以後，巴陵王寶義加督本州，晉熙王寶嵩加督南徐兗二州，江夏王寶玄爲南徐兗二州刺史加二州都督，爲例外；然督區亦不廣。按齊世，揚州都督例督南徐，則南徐無論有無軍府皆統於揚州都督；而南兗不在揚州督區內，與宋亦同。

### (3) 南兗都督區

據宋書諸帝本紀及諸人列傳，歷任南兗州刺史者，其督區如次：

劉道憐(晉末——宋永初三)——都督徐兗青三州、揚州之晉陵諸軍事、徐兗二州刺史。

檀道濟(永初三——元嘉三)——監南兗之江北淮南諸郡軍事、南兗州刺史。後增督青州、徐州之淮陽下邳琅邪東莞五郡諸軍事。

劉遵考(元嘉八)——督南兗州之江北淮南諸軍事、南兗州刺史，領廣陵太守。

江夏王義恭(元嘉九——一七)——都督南兗徐兗青冀幽六州及豫州之梁郡諸軍事、南兗州刺史，鎮廣陵。

臨川王義慶(元嘉一七——二一)——同前，惟無豫州之梁郡。

衡陽王義季(元嘉二一——二二)——都督刺史先與義慶同，後與義恭同，鎮彭城。

武陵王駿(元嘉二八)——元嘉二十五年，爲都督南兗徐兗青冀幽六州、豫州之梁郡諸軍事、徐州刺史，鎮彭城。始興王濬爲南兗州，駿解督南兗。二十八年，復督南兗州、南兗刺史，「當鎮山陽」。

江夏王義恭(元嘉二八——二九)——都督南兗南徐揚豫徐兗青冀幽并司雍秦十三州諸軍、南兗州刺史，移鎮盱眙，以禦魏師。

沈慶之(元嘉三〇——孝建二)——都督南兗徐兗豫四州諸軍事，南兗州刺史，鎮盱眙。後還鎮廣陵，加督青冀幽三州。

西陽王子尚(孝建三)——都督南兗二州諸軍事、南兗州刺史。〔本傳書事如此，與竟陵王誕都督南兗二州相重複。按本紀，是年六月丙子「以西陽王子尚爲揚州刺史，秘書監建安王休仁爲南兗州刺史。」二王相代，督區蓋同。而休仁傳固作都督南兗徐二州。則子尚「南徐、兗」當作「南兗、徐」。〕

建安王休仁(孝建三——大明元)——都督南兗徐二州諸軍事、南兗州刺史。

竟陵王誕(大明元——三)——都督南兗(此處原衍「南」字)徐兗青冀幽六州

諸軍事、南兗刺史。

沈慶之(大明三——四)——都督南兗徐兗三州諸軍事、南兗刺史。

晉安王子勛(大明四——七)——都督南兗州、徐州之東海諸軍事、南兗刺史。

蕭道成(泰始四——七)——督南兗徐二州諸軍事、南兗刺史。五年，進督兗青冀三州。

張永(元徽二)——都督南兗徐青冀益(并?)五州諸軍事、南兗州刺史。

蕭道成(元徽二——五)——都督南兗徐兗青冀五州諸軍事、南兗州刺史。

黃回(昇明二)——同上。

按：南兗都督鎮廣陵。據上所列，自元嘉中葉以後其督區最大時爲南兗、徐、兗、青、冀、幽六州，或無幽，或又無青、冀，而南兗及徐爲最基本督區。又比觀南徐都督與南兗都督之年代，可知元嘉大明中，此二都督各自獨立，惟孝建中南兗都督之子尚休仁統隸於南徐而已。泰始以後，南兗都督皆用異姓，故督區雖仍北至青冀，其權甚重，但形式上却統隸於南徐。

蕭齊之世，據南齊書各本紀，先後爲南兗州刺史者有王敬則、陳顯達、柳世隆、竟陵王子良、呂安國、張岱、安陸王子敬、晉安王子懋、西陽王子明、南海王子罕、王玄邈、廬陵王寶源、蕭穎胄、邵陵王寶攸、張冲、陸慧曉、張稷十七人。而裴叔業傳，於永元元年亦官南兗刺史。據各人本傳，此十八人者就中十五人皆以南兗刺史都督南兗、兗、徐、青、冀五州諸軍事。惟蕭穎胄、邵陵王寶攸、張稷三人傳文稍異。蕭穎胄傳云，督南兗、徐、青、冀、荆五州，「荆」字必誤無疑。寶攸傳云，都督南北徐、南兗、青、冀五州。按，齊世，南徐例不隸南兗都督，且有青冀，而無兗州，亦不合理。張稷傳，爲都督南兗州諸軍事、南兗州刺史，進督北徐兗青冀五州諸軍事。此文是否有誤，亦待考。總之，蕭齊之世，南兗都督區定型爲南兗、兗、徐、青、冀五州。惟淮北之地多已入魏，故此督區實轄之地亦惟洪澤東南江淮之間而已。

#### (4) 徐州都督區

宋世歷任徐州刺史，多加都督。茲據各人本傳，列其督區如次：

劉懷慎(永初元)——督徐兗青淮北諸軍事、徐州刺史。

竟陵王義宣(元嘉七——八)——都督徐兗青冀幽五州諸軍事、徐州刺史。

吉毓(元嘉八)——監徐兗二州、豫州之梁郡諸軍事、徐州刺史。

臧質(元嘉一八)——都督徐兗二州諸軍事、徐兗二州刺史。

衡陽王義季(元嘉二二——二四)——元嘉二十一年，爲都督南兗徐兗青冀幽

六州、南兗州刺史。二十二年，進督豫州之梁郡，遷徐州刺史，都督如故。

武陵王駿(元嘉二五——二八)——都督南兗徐兗青冀六州、豫州之梁郡諸軍事、徐州刺史，鎮彭城。尋領兗州刺史。始興王濬爲南兗州，駿解督南兗。

蕭思話(元嘉二八——三〇)——監徐兗青冀四州、豫州之梁郡諸軍事、徐兗二州刺史。

垣護之(孝建元)——督徐兗二州、豫州之梁郡諸軍事、徐州刺史。

沈曇慶(大明元)——督徐兗二州及梁郡諸軍事、徐州刺史。

湘東王彧(大明八)——都督徐兗二州、豫州之梁郡諸軍事、徐州刺史。

義陽王昶(大明八——泰始元)——都督徐兗南兗青冀六州、豫州之梁郡諸軍事、徐州刺史，鎮彭城。

王玄載(泰始三)——監徐州、豫州之梁郡諸軍事、徐州刺史。

按：徐州都督鎮彭城。據上引十二例，其四爲都督徐、兗二州及豫州之梁郡，其一爲都督徐、兗二州，其一爲監徐州及豫州之梁郡，其三爲都督徐、兗、青、冀諸州，或加豫州之梁郡。其三爲都督南兗、兗、徐、青、冀等州及豫州之梁郡。由此觀之，其基本都督區爲徐、兗二州及豫州之梁郡，或北兼青冀，且或南兼南兗耳。最後一種情形，其督區與前考南兗都督之督區全同。是東方自江以北諸州常統一爲一個都督區，通常固多以南兗刺史兼充都督，鎮廣陵；然亦偶以徐州刺史兼充，鎮彭城也。至於其他各種情形，盡屬淮北之地。在此兩種情形下，本區都督或與南兗都督平行分立，或統隸於南兗都督，此比觀前引曾任兩區都督者之年代可知也。

自宋末盡失淮北之地，緣淮一帶爲國防前線，而淮陰爲重鎮。淮陰爲兗州治所，故以兗州刺史都督緣淮諸軍事，如王玄載、垣崇祖、周盤龍、蕭遙欣皆是也。又如周

### 魏晉南朝都督與都督區

山圖以兗州刺史督兗青冀三州、徐州東海朐山軍事，桓崇祖以兗州刺史督兗青冀三州諸軍事，實亦緣淮而已。各見本傳。

### (5) 青冀都督區

宋世，青冀二州，地狹民稀，通常皆置刺史一人兼領二州，或治東陽，或治歷城。以其在東北邊境，例加都督。其督區有溢出二州者，如杜驥督青冀二州及徐州之東莞東安二郡，顏師伯督區較驥多兗州之濟北郡，張永監青冀幽并四州；惟沈文秀督區僅青州及徐州之東莞東安二郡。各見本傳。又蕭斌督區較杜驥多幽州，見索虜傳；實土則同。按此一督區或常在徐州都督統隸之下。如索虜傳，元嘉二十七年北伐，以蕭斌爲使持節督青冀幽三州、徐州之東安東莞二郡諸軍事、青冀二州刺史。「推三齊之鋒，爲之統帥。」以武陵王駿爲使持節都督徐兗青冀幽五州、豫州之梁郡諸軍事、徐兗二州刺史。「總四州（幽州無實土）之衆，水陸並驅。」此青冀都督隸於徐州都督之佳例，一也。又張茂度傳，元嘉二十九年，「以（張）永督冀州、青州之濟南樂安太原三郡諸軍事……、冀州刺史。」督申坦等經略河南。兵敗。「永及申坦並爲統府撫軍將軍蕭思話所收，繫於歷城獄。」按蕭思話傳，元嘉二十七年，「監徐兗青冀四州、豫州之梁郡諸軍事、撫軍將軍、兗徐二州刺史。二十九年，統揚武將軍冀州刺史張永圍穀磽。」軍敗。「永坦並繫獄。」此又青冀都督隸於徐州都督之佳例，二也。

### (6) 會稽都督區

宋書州郡志一：「孝建元年，分揚州之會稽、東陽、新安、永嘉、臨海五郡爲東揚州。大明三年，罷州（揚州），以其地爲王畿；……而東揚州直云揚州。八年，罷王畿，復立揚州；揚州還爲東揚州。前廢帝永光元年，省東揚州并揚州。」則置東揚州時間甚短。齊則未嘗置州矣。前考東晉時代常以會稽內史都督浙東五郡，即此五郡也。宋書武帝紀，永初二年正月，「罷會稽郡府。」則宋初已省會稽都督。而竟陵王誕傳：「遷都督廣交二州諸軍事（略）廣州刺史。……未行，改授都督會稽東陽新安臨海永嘉五郡諸軍事、安東將軍、會稽太守。元凶弑立，以揚州（略）浙江東五郡立會州，以誕爲刺史。」據本紀，誕爲廣州刺史在元嘉二十八年五月。則元嘉末復置會稽軍府也。其後如晉熙王昶（元嘉三〇——孝建元年）、張永（泰始三）、劉躋（後廢帝即位時，見江夏王義恭傳）；及齊世竟陵王子良（宋昇明三——齊建元元）、武陵王暉（建元三）、王

敬則(建元——永明初)、隨郡王子隆(永明四)、西陽王子明(永明一〇)、廬陵王寶源(建武中)爲會稽太守，皆都督會稽、東陽、新安、臨海、永嘉五郡，各見本傳。惟宋書巴陵王休若傳：「泰始元年……出爲使持節、都督會稽東陽永嘉臨海新安五郡諸軍事，領安東將軍、會稽太守。率衆東討。進督吳吳興晉陵三郡；尋……又進督晉安□□二郡諸軍事。」此蓋因軍事臨時隨宜，非恆制也。又宋書晉熙王昶傳：「世祖(孝武帝)踐祚，遷太常，出爲東中郎將、會稽太守；尋監會稽東陽臨海永嘉新安五郡諸軍事。」觀「尋監」之語，知亦廢置不恆歟？

### (7) 南豫、豫州都督區

宋初承晉，豫州刺史鎮壽陽。永初三年，分淮東爲南豫州，治歷陽。自後時合時分。茲就其分合之督區情形排列如次；(年代據紀，督區據各人本傳。)

南豫州	豫州
<u>彭城王義康</u> (永初元—三)：督豫司 <u>雍</u> <u>并</u> 四州軍事、 <u>豫州</u> 刺史。又領司州刺史，進督 <u>徐州</u> 之 <u>鍾離</u> 、 <u>潤州</u> 之 <u>義陽</u> 諸軍事。	
<u>彭城王義康</u> (永初三年二月)：監 <u>南豫</u> <u>豫</u> 司 <u>雍</u> <u>并</u> 五州諸軍事、 <u>南豫州</u> 刺史。	<u>劉粹</u> (永初三年二月—元嘉元)：督豫司 <u>雍</u> <u>并</u> 四州、 <u>南豫州</u> 之 <u>梁</u> <u>弋陽</u> <u>馬頭</u> 三郡諸軍事、 <u>豫州</u> 刺史。
<u>廬陵王義眞</u> (永初三—元嘉元)：都督 <u>南豫</u> <u>豫</u> 司 <u>秦</u> <u>并</u> 六州諸軍事、 <u>南豫州</u> 刺史，鎮 <u>歷陽</u> 。	
<u>江夏王義恭</u> (元嘉元—三)：同上。	
<u>到彥之</u> (元嘉三—六)：監六州諸軍事刺史同上。	
<u>長沙王義欣</u> (元嘉七—六)：監豫司 <u>雍</u> <u>并</u> 四州諸軍事、 <u>豫州</u> 刺史，鎮壽陽。	
<u>始興王濬</u> (元嘉一六—一七)：都督 <u>南豫</u> <u>豫</u> 司 <u>雍</u> <u>并</u> 五州諸軍事、 <u>南豫州</u> 刺史。	<u>劉遵考</u> (元嘉一六—二一)：監豫司 <u>雍</u> <u>并</u> 四州、 <u>南豫</u> 之 <u>梁</u> <u>弋陽</u> <u>馬頭</u> 、 <u>荊州</u> 之 <u>義陽</u> 四郡諸軍事、 <u>豫州</u> 刺史。
<u>武陵王駿</u> (元嘉一七—二二)：都督五州刺史並同上，戍石頭。	
<u>南平王鑠</u> (元嘉二二)：都督 <u>南豫</u> <u>豫</u> 司 <u>雍</u> <u>秦</u> <u>并</u> 六州諸軍事、 <u>南豫州</u> 刺史。	
<u>南平王鑠</u> (元嘉二二—三〇)：仍都督豫司 <u>雍</u> <u>秦</u> <u>并</u> 五州諸軍事、 <u>豫州</u> 刺史，鎮壽陽。	
<u>宗懿</u> (孝建三—大明三)：豫州刺史，監五州諸軍事。	
<u>湘東王彧</u> (泰始元)：都督 <u>南豫</u> <u>豫</u> 司 <u>江</u> <u>四</u> <u>揚</u> 州之宣城諸軍事、 <u>南豫州</u> 刺史，鎮姑孰。	<u>山陽王休祐</u> (泰始元)：都督豫司 <u>二</u> <u>南豫</u> 之 <u>梁</u> 郡諸軍事、 <u>豫州</u> 刺史。
<u>劉遵考</u> (泰始元年九月至十二月)：都督 <u>南豫</u> <u>豫</u> 諸軍事、 <u>南豫</u> 刺史。	

山陽王休祐(泰始二年正月至九月)：都督豫江司三州、豫州刺史。按時江州刺史晉安王子勣叛，以休祐討之。

殷琰(泰始元年十月)：督豫司二州、南豫州之梁郡諸軍事、豫州刺史。

劉勔(泰始三——五)：都督豫司二州諸軍事、豫州刺史。

邵陵王友(昇明二——三)：都督南豫豫司三州諸軍事、南豫刺史。

蕭晃(昇明二——三)：監豫司二州、〔錢大昕曰脫郢州二字〕之西陽諸軍事、豫州刺史。

綜觀此表，豫州無論分合，其督區則同。卽合爲一州，則豫州刺史都督豫司雍并等州；分爲二州，則南豫刺史都督南豫豫司雍并等州，而豫州刺史都督豫司雍并及南豫州之梁郡等郡。自泰始以後皆不督雍并，蓋豫州本爲一都督，統屬荊州，固不宜又遠隸豫州都督也。

齊世，南豫州刺史通常加都督南豫司二州。如柳世隆、建安王子真、巴陵王子倫、廬陵王子卿、宜都王鑑皆是也。各見本傳。惟晉安王子懋傳，都督南豫豫司三州，「魚復侯子饗爲豫州，子懋解督。」按：時在齊初。則終齊世其督區爲南豫司二州。而豫州刺史通常加都督豫州及郢州之西陽、司州之汝南二郡。如魚復侯子饗、西昌侯鸞、王敬則、崔慧景、王廣之、蕭遙欣、蕭遙昌皆是也，各見本傳。惟子饗後又加督南豫州之歷陽、淮南、潁川、汝陽四郡。時亦在齊初。

### (8) 荆州都督區

自晉末以來，荊州刺史例加都督荆雍益寧梁秦諸州，或分荆置湘，仍隸督之。入宋以後，歷任荊州刺史者，據宋書南郡王義宣傳及各帝本紀，有宜都王義隆(文帝)、謝晦、彭城王義康、江夏王義恭、臨川王義慶、衡陽王義季、南譙王義宣(兩任)、始興王濬、隨王誕、朱修之、臨海王子頃、山陽王休祐、巴陵王休若、建平王景素、蔡興宗、沈攸之、武陵王贊。據此諸人本傳，修之爲荊州刺史加都督，不書州數，今不具論。而義隆、義康(云「荆湘雍梁益南北秦八州」明脫「寧」字)、義恭、義季、誕、子頃、休祐、休若、景素、興宗、攸之、贊十二人及義宣第二任皆爲都督荆、湘、雍、益、寧、梁、南北秦八州諸軍事、荊州刺史。惟義慶、濬及義宣第一任都督荆雍益寧梁南北秦七州，少湘州；謝晦都督荆湘雍寧益南北秦七州，少梁州。按：宋書州郡志，湘州，文帝元嘉八年省，十七年又立，二十九年又省，孝武帝孝建元年又

立。檢義慶爲荊州，在元嘉九年，義宣第一任在元嘉二十一年，濬爲荊州，在元嘉三十年，皆併湘州入荊州時也。又按謝晦傳云：「都督荆湘雍益寧南北秦七州諸軍事。」但後文奏啓云「八州之政」，悲人道云「臨八方以作鎮」，是亦八州。蓋後又加督梁州也。則宋世荊州都督皆督荆、湘、雍、益、寧、梁、南北秦八州之地也。

南齊書各帝本紀，載歷任荊州刺史者，有豫章王嶷、臨川王映、廬陵王子卿、安陸王子敬、巴東王子響、隨郡王子隆、臨海王昭秀、永嘉王昭粲、聞喜公遙欣、南康王寶融(和帝)、建安王寶寅、邵陵王寶攸、蕭穎胄十三人。檢諸人列傳：嶷督八州如宋制。映於八州外又督巴州。子卿督荆湘益寧梁南北秦七州；「始興王爲益州，子卿解督。」按其時鄱陽王鑠爲雍州，故子卿亦不督。子敬督荆湘梁雍南北秦六州，少益寧二州。子響督七州，少益州。按二人事在永明五年至八年，其時始興王鑠爲益州，故也。子隆督荆雍梁寧南北秦六州。「其年(永明八年)，始興王鑠罷益州，進號督益州。……十二年，晉安王子懋爲雍州，子隆復解督。」按永明六年至十年，子懋爲湘州，十年至隆昌元年，南平王銳爲湘州，故子隆亦不督湘州。自昭秀至寶寅五人皆督荆雍益寧梁南北秦七州，不督湘州。按此五人任職自建武元年至永元三年，時宗室安陸侯子寶暉爲湘州，故不督歟？寶攸傳不書。而穎胄亦監八州。故綜觀齊世，荊州督區仍爲荆湘雍益寧梁南北秦八州，惟諸王爲屬州刺史，則解督耳。

### (9) 湘州都督區

自晉以來，湘州屢置屢廢，至宋孝武帝孝建元年復置以後，其事始定。宋書張邵傳：「武帝受命，……分荊州立湘州，以邵爲刺史，將置府。邵以爲長沙內地，非用武之國，置署妨人，乖爲政要。帝從之。」則宋初置湘州，不置都督也。元嘉八年罷州。十六年復置，以始興王濬爲刺史，加都督湘州諸軍事。十七年，南平王鑠繼爲都督湘州諸軍事、湘州刺史。其後迄齊，爲湘州者多加督監或都督湘州諸軍事。如巴陵王休若、建平王景素、王僧虔(以上宋世)、王奐、呂安國、柳世隆、晉安王懋(以上齊世)，皆是也。各見本傳。宋書海陵王休茂傳：「庾深之……元嘉二十九年……爲長沙內史，南郡王宣義爲荆湘二州，加深之寧朔將軍，督湘川七郡。」是亦都督之類也。

### (10) 雍州都督

雍州刺史例加都督，鎮襄陽。宋書各帝本紀，記歷任雍州刺史三十四人，茲據各

魏晉南朝都督與都督區

人本傳載有督區者條例於次：

褚叔度(永初三——元嘉元)：監雍梁南北秦四州、(脫荊州二字)之南陽竟陵順陽義陽新野隨六郡諸軍事。

劉粹(元嘉元——三)：督雍梁南北秦四州、荊州之南陽竟陵順陽襄陽新野隨六郡諸軍事。

劉遵考(元嘉三——五)：督雍梁南北秦四州、荊州之南(脫陽字)竟陵順陽襄陽新野隨六郡諸軍事。

劉道產(元嘉八——一九)：督雍梁南秦三州、荊州之南陽竟陵順陽襄陽新野隨六郡諸軍事。

蕭思話(元嘉二〇——二二)：監雍梁南北秦四州、荊州之南陽竟陵順陽襄陽新野隨六郡諸軍事。

武陵王駿(元嘉二二——二五)：都督雍梁南北秦四州、荊州之襄陽竟陵南陵(陽)順陽新野隨六郡諸軍事。

蕭思話再任(元嘉二五——二六)：監雍梁南北秦州、荊州之竟陵隨二郡諸軍事。

廣陵王誕(元嘉二六——二八)：都督雍梁南北秦四州、荊州之竟陵隨二郡諸軍事。

臧質(元嘉二八——三〇)：監雍梁南北秦四州諸軍事。

柳元景(元嘉三〇)：監雍梁南北秦四州、荊州之竟陵隨二郡諸軍事。

再任(孝建元)：都督州郡同上。

武昌王渾(孝建元——二)：監州郡同上。

海陵王休茂(大明二——五)：都督雍梁南北秦四州、郢州之竟陵隨二郡諸軍事。

永嘉王子仁(大明五)：監州郡同上。

劉秀之(大明五——八)：都督州郡同上。

晉安王子勛(大明八)：同上。

湘東王彧(泰始元)：都督雍梁南北秦四州、郢州之竟陵諸軍事。

袁顥(泰始元二)：督雍梁南北秦四州、郢州之竟陵隨二郡諸軍事。

沈攸之(泰始二)：督雍梁南北秦四州、郢州之竟陵諸軍事。

巴陵王休若(泰始二——四)：都督雍梁南北秦四州、荊州之竟陵隨二郡諸軍事。

張興世(泰豫元——元徽三)：督雍梁南北秦、郢州之竟陵隨二郡諸軍事。

張敬兒(元徽三——昇明三)：督雍梁二州、郢司二郡諸軍事。(錢大昕曰：  
「郢司二郡殊未核。據柳世隆傳，書敬兒官銜，作郢州之竟陵、司州之隨郡。」)

按：此雖僅二十二任，然所缺十二人年月皆較短，故此二十二人即可代表全宋時代。又按：據前列材料可知：(1) 自褚叔度至武陵王駿凡六人為一階段。其時代自宋初至元嘉二十五年。其督區為雍梁南北秦四州及荊州之南陽、竟陵、順陽、襄陽、新野、隨六郡。(褚叔度傳「四州」下明奪「荊州」二字，又此諸傳皆有襄陽無義陽，獨此傳有義陽無襄陽，「義」字蓋誤。劉遵考傳「荊州之南」下明奪「陽」字。武陵王駿傳「南陵」蓋「南陽」之誤。)(2) 自蕭思話之再任至武昌王渾凡六任，為一階段。其時代自元嘉二十五年至孝建元年。其督區為雍梁南北秦四州及荊州之竟陵、隨二郡。檢宋書州郡志三，雍州條：「文帝元嘉二十六年，割荊州之襄陽南陽新野順陽隨五郡為雍州。」則此時雍州已包括襄陽南陽等郡，即此時期之督區，與第一階段，名異而實土則全同。(州郡志此條有隨，共五郡。然郢州條，孝武帝孝建元年，分荊州之江夏竟陵隨等郡立郢州。則元嘉末隨郡仍屬荊州也，與雍州條異。據前引蕭思話再任至武昌王渾事，知雍州條當作四郡；「隨」為衍文。)(3) 自海陵王休茂至張興世凡九人，為一階段。其時代自大明二年至元徽三年。其督區為雍梁南北秦四州及郢州之竟陵隨二郡。(州郡志二，司州隨陽郡條，隨郡原屬荊州，「孝武孝建元年度屬郢，前廢帝永光元年度屬雍，明帝泰始五年還屬郢，改為隨陽，後廢帝元徽四年度屬司州。」永光元年、泰始五年兩事，亦見本紀。則湘東王彧傳、沈攸之傳「竟陵」下無「隨」郡，張興世傳「竟陵」下有「隨」郡，皆是也；而袁顥傳、休若傳「隨二」皆衍文，休若傳「荊」又「郢」之譌。)據州郡志郢州條，此郢州之竟陵隨二郡由荊州分來，則名與第一第二階段異，而其實土亦同也。然則終宋之世，雍州都督區毫無變動，惟末際張敬兒不督南北二秦耳。

南齊書文惠太子傳(長懋)，為都督雍梁二州、郢州之竟陵、司州之隨郡諸軍事、

### 魏晉南朝都督與都督區

雍州刺史。其後，刺史蕭赤斧（建元二）、鄱陽王鏘（建元四——永明四）、張瓊（永明四）、陳顯達（永明五——八）、安隆、侯綱（永明八——九）、王奐（永明九——一）、晉安王子懋（永明一一——建武元）、曹虎（建武元——永泰元）等，其督區皆爲雍梁南北秦及郢州之竟陵、司州之隨郡。各見本傳。按宋書州郡志二，司州隨陽郡，本屬郢州。「元徽四年，度屬司州。」南齊書州郡志下，隨郡亦屬司州。則齊世雍州督區實亦與宋世全同。惟初期無南北二秦耳。

按前考宋齊之世，荊州刺史例督荆湘雍梁益寧南北秦八州。則此雍州都督經常統隸於荊州都督也。

### (11) 梁秦都督區

宋齊之世，梁南秦恆置一刺史，亦常加都督。如吉翰、劉道產、蕭思話等皆爲督梁南秦二州諸軍事、梁南秦二州刺史，劉秀之、王玄載皆爲督梁南北秦三州諸軍事、梁南秦二州刺史，崔慧景、曹虎皆爲都督梁南北秦沙四州諸軍事、梁南秦二州刺史。皆見宋書齊書各入本傳。

按：前考宋齊之世，雍州刺史例督雍梁南北秦四州及竟陵隨二郡，則此梁秦都督經常統隸於雍州都督也。雍州都督又統隸於荊州都督。是軍府大小相轄，上下三層矣。

### (12) 益州都督區

前考東晉時代，益州刺史常督益寧及梁州之巴西梓橦宕渠諸郡。宋書朱齡石傳：「義熙……九年，遣諸軍伐蜀，令齡石爲元帥，以爲建威將軍、益州刺史。……尋加節益州諸軍事。……平蜀，……進號輔國將軍，尋進監益（當作梁）州巴西梓橦宕渠南漢中、秦州之安固懷寧六郡諸軍事。」張茂度傳：「元嘉元年，出爲使持節、督益寧二州、梁州之巴西梓橦宕渠南漢中、秦州之懷寧安固六郡諸軍事、冠軍將軍、益州刺史。」吉翰傳：元嘉三年，爲益州刺史，督州郡如茂度。是督區視晉稍廣。檢宋書州郡志四，巴西梓橦宕渠南漢中懷寧安固六郡皆於元嘉十六年度屬益州。故此後以迄於齊，任益州刺史者皆僅云督益寧二州，如陸徽、劉秀之、蕭惠開、王玄載、傅琰、陳顯達、劉悛諸人皆是也。各見本傳。

### (13) 江州都督區

前考東晉江州都督大體督本州及荊州東部豫州西部數郡，但尚未完全定型。宋書

檀韶傳，義熙十二年「遷督江州、豫州之西陽新蔡二郡諸軍事、江州刺史。」王弘傳，義熙十四年，爲江州刺史，所監州郡與韶同。則督區較爲縮小。弘任職直至宋元嘉初。其後檀道濟、南譙王義宣、臨川王義慶、彭城王義康、廬陵王紹相繼爲江州，時間自元嘉初至二十六年，據各人本傳，其督區如次：

道齊：都督江州之江夏、豫州之西陽新蔡晉熙四郡諸軍事。

義宣：都督江州、豫州之西陵西熙新蔡三郡諸軍事。

義慶：都督江州之西陽晉熙新蔡三郡諸軍事。

義康：都督江州諸軍事。

紹：都督江州、豫州之西陽晉熙新蔡三郡諸軍事。

按：道濟條，「江州」下脫「荊州」二字。義慶條，「江州」下脫「豫州」二字。義宣條，「西陵」爲「西陽」之誤、「西熙」爲「晉熙」之誤。則其時督區已定型爲江州及豫州之西陽晉熙新蔡三郡也。而建平王宏傳，元嘉末，「出爲征虜將軍江州刺史。」不言督。檢文帝紀，宏官江州，在元嘉二十六年。考竟陵王誕傳：「元嘉……二十六年，出爲都督雍梁南北秦四州(略)諸軍事、後將軍事、雍州刺史。……上欲大舉北討，乃罷江州軍府，文武悉配雍州。」時省軍府，故宏傳不言「都督」或「監」「督」也。然孝武帝(駿)紀云，元嘉二十八年，「遷都督江州、荊州之江夏、豫州之西陽晉熙新蔡四郡諸軍事。」則江州旋復置軍府也。自此迄宋末，臧質、蕭思話、義陽王昶、桂陽王休範、晉安王子勛、建安王休仁、山陽王休祐、王景文、邵陵王友、蕭賾、蕭嶷相繼爲江州刺史。據各人本傳，其督區如次：

質：都督江州諸軍事。

思話：都督江州、豫州之西陽晉熙新蔡諸軍事。

昶：都督江州、郢州之西陽、豫州之新蔡晉熙二郡諸軍事。

休範：都督江郢司廣交五州、豫州之西陽新蔡晉熙、湘州之始興四郡諸軍事，鎮尋陽。

子勛：督江州、南豫州之晉熙新蔡、郢州之西陽三郡諸軍事。

休仁：同上。

休祐：都督江郢雍湘五州。(脫一州)

景文：都督江州、郢州之西陽、豫州之新蔡晉熙三郡諸軍事。

友：督江州、豫州之西陽新蔡晉熙三郡諸軍事。

熙：督區較友少西陽郡。

嶷：同上。

據此所列，其督區仍爲江州及豫州之晉熙新蔡二郡，西陽雖由豫州度屬郢州，然仍常在江州軍府統督之下。至於休範、休祐所督，非恆制矣。

宋末，江州都督已不督西陽。南齊書王延之傳，爲江州刺史，都督江州、豫州之新蔡晉熙二郡諸軍事。時在齊初，與宋末全同。安成王暉傳，督江州、豫州之晉熙諸軍事。時在建元四年。是又不督新蔡郡矣。王奐傳：「永明二年，徙爲散騎常侍、江州刺史。初省江州軍府。」故其後隨郡王子隆、武陵王曇、巴東王子響皆不云都督，各見本傳。而鄱陽王鏘傳，永明中（八年）「出爲江州刺史。……九年始親府州事。加使持節、都督江州諸軍事、安南將軍，置佐史。……先是二年省江州府，至是乃復。」然此後爲江州者只云都督本州，無兼督他州之零郡者矣。

總上所考，自東晉，歷宋齊，江州軍府之督區，逐日縮小。

#### (14) 鄢州都督區

宋書州郡志三：「孝武孝建元年，分荊州之江夏竟陵隨武陵天門、湘州之巴陵、江州之武昌、豫州之西陽，……立郢州。天門後還荆。」鎮夏口，見宋書何尚之傳及蕭思話傳。何尚之傳又云：「荆揚二州戶口半天下，江左以來，揚州根本，委荆以閫外。至是並分，欲以削臣下之權（時分揚州置東揚州），而荆揚並因此虛耗。尚之建言復合二州。上不許。」蓋孝武天性忌刻，寧可令上下虛耗，不使大臣有凌逼之勢也。齊世因之不改。爲上流一大重鎮。梁武帝云：「郢州控帶荆湘，西注漢沔。」（梁書武帝紀）是也。

蕭思話傳，始置郢州，以思話爲刺史，「都督郢湘二州諸軍事。」其後歷任刺史者，如劉秀之（孝建二）監郢州諸軍；蔡興宗（泰始三——五）都督郢州諸軍事；沈攸之（泰始五——泰豫元）監郢州諸軍事，後又進監豫州之西陽司州之義陽諸軍事；劉秉（泰豫元）亦都督郢州、豫州之西陽、司州之義陽二郡諸軍事；晉熙王燮（元徽元——昇明元）監郢州與秉同。劉秉事見長沙王道憐傳；餘各見本傳。是宋世督區除本州

外，多有西陽義陽二郡。黃回傳，爲郢州刺史，督郢州、司州之義陽諸軍事。按時在昇明元年，西陽郡已度屬郢州故也。

齊以後，任郢州刺史者，先有西昌侯鸞（建元二——四）、廬陵王子卿（建元四——永明元）、安陸侯緬（永明元——五），皆都督郢州、司州之義陽軍事。是與宋末全同。自永明七年以後，建安王子真、晉熙王錄、蕭遙昌、江夏王寶玄、張沖相繼爲郢州刺史，皆都督郢司二州諸軍事。各見本傳。蓋義陽一郡爲司州重地，且即爲司州刺史治所，郢州都督既統義陽，即無異兼統全司州也。是名異而實亦同。

#### （15）廣州都督區 附交州都督區

宋承東晉，廣交二州自爲一都督區，以廣州刺史兼充都督。如張茂度、劉湛、陸徽、隨王誕皆爲督交廣二州諸軍事、平越中郎將、廣州刺史，各見本傳。自元嘉末以後，督區偶有擴張，舉例如次：

廬江王樟：都督廣交二州、荊州之始興臨安二郡諸軍事。（本傳）〔按無臨安郡，當作「臨賀始安三郡」〕

臨海王子頃：都督廣交二州、湘州之始興始安臨賀三郡諸軍事。（本傳）

始安王子真：監廣交二州、始興始安臨賀三郡諸軍事。（本傳）

陳顯達：督廣交越三州、湘州之廣興軍事。（南齊書本傳）

周盤龍：督交廣越寧、湘州之廣興諸軍事。（宋書沈攸之傳，而南齊書盤龍傳作交廣二州）

按：越州乃由廣交分置，故無所擴充，所擴充者惟湘州之南部耳。考竟陵王誕傳，元嘉末，「遷都督廣交二州諸軍、安南將軍、廣州刺史，當鎮始興。未行。」據文帝紀，元嘉二十八年五月，以誕爲廣州刺史。二十九年五月，「以始興臨賀始安三郡屬廣州。」據州郡志，三十年，此三郡復度湘州。蓋誕以諸王出鎮，故廣其地，近其鎮所；旋此三郡雖仍度屬湘州，但以地在嶺南，於廣交爲近，故仍屬廣州都督也。

交州雖隸廣州都督，但本州刺史亦常加督。如蕭景憲督交州、廣州之鬱林寧浦二郡諸軍事、交州刺史，見南夷林邑傳。又吳喜亦同，見本傳。

入齊以後，廣交似不置督，其詳待考。

### (丁) 梁 陳

梁書、陳書皆無地志，據徐文范輿地表，梁武帝天監初有州二十三，天監末有州四十五，大通時有州八十六，中大同時有州一百零四，梁末江北及荆雍以西之地盡失，存州五十四。陳宣帝太建初收復淮南地，故有州八十餘；其後又失江北之地，存州六十四。據此而言，梁武一代分置諸州，四倍於初，史多闕略，督區不能盡詳。然諸紀所記刺史任免仍惟舊州，諸傳所記加都督者亦類爲舊州刺史，則置州雖多，然重要州鎮仍存舊觀也，茲仍採諸紀傳，考其梗概。

#### (1) 揚州都督區

前考宋齊之世，揚州刺史例督揚及南徐兩州。今考梁代任揚州刺史加都督者，先後有臨川王宏(天監元——一七)、晉安王綱(中大通二——三)、武陵王紀(中大通四——大同三)、宣城王大器(大同四——太清三)、南海王大臨、王僧辯(承聖元——四)皆都督揚、南徐二州諸軍事，各見本傳。末葉分揚置東揚，故王僧辯傳，爲揚州刺史都督揚、南徐、東揚三州諸軍事。實際督區則未變。入陳以後，諸傳記刺史加都督者，安成王頃(高宗)(天嘉三——光大二)都督揚、南徐、東揚、南豫、北江五州諸軍事，始興王叔陵(太建九——一二)、新安王伯固(太建一三)皆爲都督揚、南徐、東揚、南豫四州諸軍事。則視齊梁小異。

#### (2) 南徐都督區

梁書安成王秀傳，梁開國，秀爲使持節、都督南徐二州諸軍事、南徐刺史。此尙承齊末之制。其後，鄱陽王恢(天監二——四)、建安王偉(天監四——五)、豫章王綜(天監五——一〇)、南康王績(天監一〇——一五)、廬陵王續(普通四——中大通二)、新興王大莊(太清三——大寶二)、侯安都(紹泰元)爲南徐刺史，皆都督本州。各見本傳。(續傳有脫誤)。入陳以後，侯安都(永定三——天嘉四)、周寶安、黃法誠(光大元二)，淳于量(光大二——太建五)爲南徐刺史，亦都督本州。徐度(永定元——三)、鄱陽王伯山(天嘉六——光大元)爲南徐刺史，加緣江都督。各見本傳。其職實同。惟新安王伯固傳，太建七年，遷使持節、散騎常侍、都督南徐南豫南北兗四州諸軍事，鎮北將軍、南徐州刺史。此特例也。

### (3) 南兗都督區

南齊時代，南兗都督區，爲南兗、兗、徐、青、冀五州。入梁以後，蕭景(天監元—五)、昌義之(天監初)、長沙王業(天監七—八)、始興王憺(天監八—九)、晉安王綱(天監九—一—二)、蕭景(天監一二—一三)、南康王績(天監一七—普通四)、豫章王綜(普通四—六)、蕭藻(中大通三—六)爲南兗州刺史，皆都督南兗、兗、徐、青、冀五州諸軍事。各見本傳。「兗」或作「北兗」(景、憺、綱、績)，其實一也。故與南齊全同。惟南康王績傳，子會理爲都督南北兗、北徐、青、冀、東徐、譙七州諸軍、南兗州刺史。此爲特例。時在太清中，其後數年，江北之地盡爲北齊所有。

### (4) 徐兗都督區

徐兗爲東北邊境，故爲刺史者多加都督軍事。茲舉北徐刺史加都督之例如次：

梁書昌義之傳：天監二年，假節、督北徐州諸軍事、北徐州刺史。十五年，復爲都督北徐州緣淮諸軍事、北徐刺史。

裴邃傳：普通中，除持節、督北徐州諸軍事、北徐州刺史。

同傳：子之禮，都督北徐仁睢三州諸軍事、北徐刺史。時在武帝末。

魏故侍中吳郡王蕭正表墓誌：武帝末，爲都督北徐西徐仁睢安五州諸軍事、北徐州刺史。(吳表引)

按：武帝紀，大同六年九月，「移安州置定遠郡，受北徐州都督。」西徐、仁、睢不知何時屬北徐督。茲再舉北兗州刺史加都督之例如次：

梁書張惠紹傳：天監初，都督北兗州諸軍事、北兗州刺史。

康紘傳：天監九年，督北兗州緣淮諸軍事、北兗州刺史。

明山賓傳：天監十五年，督緣淮諸軍事、北兗州刺史。

陳慶之傳：普通中，都督緣淮諸軍事、北兗州刺史。

據此而言，徐、兗刺史各加都督軍事，似不相統率，然都督緣淮亦可能兼統淮水中下流南北諸州。其詳待考。

### (5) 豫州都督區與司州都督區

梁亦置豫州都督，茲舉刺史加都督之例如次：

馮道根傳，天監八年，假節、督豫州諸軍事、豫州刺史。

馬仙琕傳，天監十一年，持節、督豫北豫霍三州諸軍事、豫州刺史。

裴邃傳，普通二年，督州刺史同上，鎮合肥。

夏侯亶傳，普通六年，都督豫州緣淮、南豫霍義定五州諸軍事、豫南豫二州刺史。

同傳，弟慶，中大通六年，督豫淮陳潁建霍義七州諸軍事、豫州刺史。

據此而言，梁世，豫州都督不統司州。而陳慶之傳，中大通二年，都督南北司西豫豫四州諸軍事、南北司二州刺史。羊雅仁傳，大同七年，都督南北司豫楚四州諸軍事、北司州刺史，遷都督豫司淮冀殷應西豫等七州諸軍事、司豫二州刺史，鎮懸瓠。則司豫亦常爲一都督區，惟以司州刺史兼充都督，與梁不同耳。

按梁世，南豫先治歷陽，徙治合肥，後移壽陽；司州治義陽。梁末司豫之地盡失，南豫州移治姑孰。陳承之，爲刺史者多加本州都督，如周文育、侯安都、魯廣達、徐敬成、黃法廩、樊猛皆是也。敬成見陳書徐度傳，猛見樊毅傳，餘各見本傳。又程靈光傳，督南豫州緣江諸軍事、南豫州刺史；高宗紀（太建十二年），爲南豫刺史，督緣淮軍防事；亦督本州之變文耳。太建中，江北舊南豫之地曾一度入陳，亦置豫州都督，如吳明徹傳，都督豫合建光朔北徐六州諸軍事、豫州刺史。黃法廩傳全同。鎮壽陽。然不數年復失之。

#### （6）會稽東揚州都督區

梁初，承齊置會稽都督。梁書永陽王伯游傳，天監四年，督會稽、東陽、新安、永嘉、臨海五郡諸軍事、會稽太守。是其例也。武帝紀，普通五年三月，分揚州江州置東揚州，以會稽太守武陵王紀爲刺史。考臨城公大連傳，太清中，爲東揚州刺史，而有中兵參軍；是仍置督府也。又陳書高祖紀上，梁簡文帝大寶二年十一月，「授高祖使持節、都督會稽東陽新安臨海永嘉五郡諸軍事、平東將軍、東揚州刺史。」既爲本州刺史，不云都督本州，而云都督五郡，何耶？然加都督則不待言。又陳書世祖紀，梁東揚州刺史張彪起兵，世祖擊平之，還以世祖爲「持節、都督會稽等十郡諸軍事、宣毅將軍、會稽太守。」據梁書本紀，事在太平元年。則梁末將禪前又廢東揚州，置會稽都督也。陳初，沈恪「除散騎常侍、忠武將軍、會稽太守。世祖嗣位，進督會稽、東

陽、新安、臨海、永嘉、建安、晉安、新寧、信安九郡諸軍事，將軍太守如故。」見陳書本傳。徐度傳，亦於天嘉初爲使持節、都督會稽太守，與沈恪同。則梁末陳初之會稽都督區視梁初以前爲廣矣。陳書世祖紀，天嘉三年六月，「以會稽、東陽、臨海、永嘉、新安、新寧、晉安、建安八郡置東揚州。」則視舊日東揚州反爲擴大。自是至陳亡，東揚州不會廢罷。然豫章王叔英傳，大建初，爲都督東揚州諸軍事、東揚州刺史。永陽王伯智傳，至德初，「爲使持節、都督東揚豐二州諸軍事、平東將軍，領會稽太守。」據本紀，實爲東揚州刺史。鄱陽王伯山傳，「至德四年，出爲使持節、都督東揚豐二州諸軍事、東揚州刺史。」則置州以後仍置都督府也。

### (7) 荆州都督區

梁書諸帝本紀載荊州刺史甚詳備，茲據各人本傳錄其督區如次：

始興王憺(天監元——七)：都督荆湘益寧南北秦六州諸軍事。

安成王秀(天監七——一)：都督荆湘雍益寧南北梁秦九州諸軍事。

鄱陽王恢(天監一——三)：都督荆湘雍益寧南北梁南北秦九州諸軍事。

晉安王綱(天監一三——四)：都督荆雍梁南北秦益寧七州諸軍事。

始興王憺再任(天監一四——八)：都督荆湘雍寧南梁南北秦七州諸軍事。

鄱陽王恢再任(天監一八——普通七)：都督荆湘雍梁益寧南北秦八州諸軍事。

湘東王繹(普通七——大同五)：都督荆湘郢益寧南梁六州諸軍事。

廬陵王續(大同五——太清元)：都督荆郢司雍西北秦梁巴華九州諸軍事。

湘東王繹再任(太清元——大寶元)：都督荆雍湘司郢寧梁南北秦九州諸軍事。

據此而言，則梁亦承齊，荊州都督督荆、湘、雍、益、寧、梁、秦諸州，普通以後增督郢州，大同以後又增督司州耳。惟憺首任不督雍、梁，再任不督益州，綱不督湘州，繹首任不督雍、秦，再任不督益州，續不督湘、益、寧三州而督巴、華二州，此數者爲例外耳。檢吳表引本紀：天監元年至四年，建安王偉爲雍州刺史；天監十四年至十八年，鄱陽王恢爲益州刺史；則憺不督雍、益，蓋避諸王也。普通四年至中大通二年，晉安王綱爲雍州刺史；則繹首任不督雍州，亦避諸王也。又自大同三年以後，武陵王紀爲益

魏晉南朝都督與都督區

州刺史；則續及繹再任皆不督益州，蓋亦避諸王也。

### (8) 湘州都督區

梁初承齊，湘州刺史仍多加都督本州軍事。如天監中，楊公則、柳琰、柳忱、昌義之、王珍國皆是也，各見本傳。自普通至陳末，湘州刺史多增督他州。茲依時代列舉如次：

安成王機(梁普通三——大通二)：督湘衡桂三州諸軍事。

桂陽王象(與機相先後)：督湘衡二州諸軍事。

張纘(大同九年)：都督湘桂東寧三州諸軍事。

侯瑱(陳永定中)：都督湘桂郢巴武沅六州諸軍事。

徐度(天嘉中)：都督湘沅武巴郢桂六州諸軍事。

吳明徹(光大中)：都督湘桂武三州諸軍事。

始興王叔陵(太建四)：都督湘衡桂武四州諸軍事。

晉熙王叔文(至德中)：都督湘衡武桂四州諸軍事。

岳陽王叔慎(禎明元)：都督湘衡桂武四州諸軍事。

據此而言，普通以後，大體以湘、桂為主體，而常兼統衡、武，偶且兼統郢、巴，則與郢州都督併為一區矣。按：梁初，湘州轄境南及嶺南之始安、臨賀、始興三郡，武紀，天監六年，分湘廣置衡州，有此三郡(所得廣州地蓋極少)。同年，又分廣州置桂州，有桂林(今馬平東南)、蒼梧、鬱林等郡。十一年，於郢州之武陵郡置武州。大同六年十二月，「置桂州於湘州始安郡，受湘州督。」而其時臨賀郡已另置靜州，則此時湘桂衡武四州全境亦略相當於舊日湘州之域耳。

### (9) 雍州都督區

前考宋齊時代，雍州刺史督梁南北秦四州及郢州之竟陵、司州之隨郡諸軍事。梁書武帝紀，齊末，在雍州，即都督此四州二郡。入梁以後，為雍州刺史其督區可考見於本傳者，有建安王偉(天監元——四)、柳慶遠(天監四——七)、蕭景(天監七——一)、蕭藻(天監一一——一二)、柳慶遠再任(天監一三)、安成王秀(天監一六——七)、晉安王綱(普通四——中大通二)、廬陵王續(中大通二——大同元)、岳陽王贊(中大同元——)等。偉、慶遠(再任)、景、秀、綱五任皆都督雍、梁、南北。

秦四州、郢州之竟陵、司州之隨郡諸軍事。慶遠首任都督雍梁南北秦四州。藻都督雍梁秦三州及竟陵隨二郡。綱後權進都督荆、益、南梁三州。續都督雍、梁、秦、沙四州。晉都督雍、梁、東益、南北秦五州、郢州之竟陵、司州之隨郡諸軍事。各見本傳(綱爲紀，晉傳在北周書)。又張鑽傳，湘東王繹以鑽爲都督雍、梁、北秦、東益、郢州之竟陵、司州之隨郡諸軍事、雍州刺史，以代晉。據此而言，梁世雍州都督仍督雍梁南北秦四州及郢州之竟陵、司州之隨郡諸軍事，如齊世，偶增督沙或東益，非恆制也。梁末以後，地陷北朝矣。

### (10) 梁秦都督區

梁世，梁秦刺史仍常加都督。如天監中，吉士瞻爲梁秦二州刺史，加都督；見南史本傳。武帝世，曹義宗爲梁秦二州刺史，加都督；見南史曹景宗傳。大通中，韋放爲持節、督梁南秦二州諸軍事、梁南秦二州刺史；蘭欽爲使持節、督南梁、南北秦、沙四州諸軍事、梁南秦二州刺史；各見本傳。其後杜懷實爲梁州刺史，大同初進督華州；見杜山則傳。陰子春都督梁秦華三州諸軍事、梁秦二州刺史；見本傳。則督區仍與宋齊略同，且統隸於雍州都督，雍州都督又統隸於荊州都督，並與宋齊相同。

### (11) 益州都督區

梁世，益州刺史亦常加都督。天監初，其督區與宋齊全同；如梁書長沙王業傳，天監元年，都督益寧二州諸軍事、益州刺史。其後則頗異，舉例如次：

始興王憺傳：天監九年，都督益寧南梁南北秦沙六州諸軍事、益州刺史。

鄱陽王恢傳：天監十三年，都督益寧南北秦沙七州(蓋脫南北梁)諸軍事、益州刺史。

簡文帝紀：普通元年，都督益寧雍梁南北秦沙七州諸軍事、益州刺史。

武陵王紀傳：武帝末，都督益梁等十三州諸軍事、益州刺史。

據此而言，梁世益州刺史常兼督梁秦沙等州，似與雍州都督衝突。蓋益州都督之基本督區仍爲益寧也。梁末以後，地入北朝。

### (12) 江州都督區

梁世，江州刺史仍常加都督，但以都督本州爲限。如王茂(天監元——六)、安成王秀(天監六——七)、建安王偉(天監九——一二)、王茂再任(天監一二——一四)、

### 魏晉南朝都督與都督區

晉安王綱(天監一四——一五)、廬陵王續(天監一六——普通元)、南康王續(普通五——大通二)、桂陽王象、湘東王繹(大同六——太清元)皆是也。各見本傳。入陳以後，頗不一定。有以刺史都督本州者；如晉熙王叔文(至德元)、始興王叔重(至德二——四)是也。亦有不限本州者；如周文育傳，都督江、廣、衡、交等州諸軍事，江州刺史；侯安都傳、黃法癡傳，皆爲都督江吳二州諸軍事、江州刺史；章昭達傳，都督江郢吳三州諸軍事、江州刺史；是其例也。又始興王叔陵傳，先爲持節、督江州諸軍事、江州刺史，進爲使持節、都督江郢晉三州諸軍事、江州刺史。亦其例。

#### (13) 鄱州都督區

梁初承齊，郢州刺史多都督郢司二州諸軍事。如曹景宗(天監元——四)、鄱陽王恢(天監四——)皆是也；各見本傳。恢傳又云，七年進督霍州。據徐表，六年已分豫州置霍州也。其後豫章王綜(天監一〇——一三)、安成王秀(天監一三——一六)、衡陽王元簡(天監一七——一八)、蕭景(普通元——四)、元樹(普通中)、桂陽王象(?)皆以郢州刺史都督郢霍三州諸軍事；各見本傳。而潯陽王大心傳，大同元年，爲使持節、都督郢、南北司、定、新五州諸軍事、郢州刺史。邵陵王綸傳，大同七年爲使持節、都督郢、定、霍、司四州諸軍事，郢州刺史。是末葉督區又頗變異。

入陳以後，爲郢州刺史者，章昭達(天嘉二)都督郢巴武沅四州，沈恪(天嘉中)都督郢武巴定四州，淳于量(太建中)都督郢巴南司四州，程靈洗(天嘉末至光大二)、黃法癡(光大中)、錢道戢(太建中)、荀法尚(禎明中)皆爲都督郢巴武三州，孫瑒都督郢巴武荆湘五州，陳慧紀(太建中)都督郢巴二州，各見本傳。則經常督區爲郢巴武三州也。

#### (14) 廣州都督區

梁陳之世，廣交兩州分置州郡最多，故廣州督區所督州名亦逐漸增多。茲就曾任廣州刺史其督區可考見於本傳者，依時間先後錄之於次：

樂謫：天監二年，督廣交越三州諸軍事。

蕭昌：天監六年，督廣交越桂四州諸軍事。

柳惲：天監八年，都督廣交桂越四州諸軍事。

衡陽王元簡：天監十三年，督廣交越三州諸軍事。

元景隆(法僧子)：普通末，都督廣越交桂等十三州諸軍事。

元景隆：太清初，再任，都督同上。

歐陽頤：陳永定元年，都督廣交越成定明新高合羅愛建德宜黃利安石雙十九州諸軍事。永定三年，增督衡州。

歐陽紇：天嘉五年，繼頤，都督交廣等十九州諸軍事。

沈恪：太建元年，繼紇，都督廣衡東衡交越成定新合羅愛德宜黃利安石雙十八州諸軍事。

陳方泰：太建四年，繼恪，都督廣衡交越成定明新合羅德宜黃利安建石厓十九州諸軍事。(少一州)

沈君高(君理弟)：太建八年，都督交廣等十八州諸軍事。

據此而言，梁世廣州都督仍以交廣越三州爲基本督區，時加桂州等而已。陳世廣州都督雖督至十八九州，實際地區，視梁世少桂州而多衡州東衡等耳。

### (15) 新 都 督 區

梁陳既分置新州甚多，雖其重要者仍爲舊有諸州，置都督；但新州刺史亦有加都督獨立爲區者。如梁世有衡州都督，其例如次：

梁書蕭景傳：弟回，天監六年，遷持節、督廣交越桂四州諸軍事、廣州刺史。九年，分湘州置衡州，以昌爲持節、督廣州之綏建、湘州之始安諸軍事、衡州刺史。

蘭欽傳：持節、都督衡桂二州諸軍事、衡州刺史。(按前官爲梁秦刺史。據武帝紀，大同元年見在梁秦任，則官衡州亦在大同中。)

韋粲傳：中大同十一年，遷持節、督衡州諸軍事、衡州刺史。

陳書歐陽頤傳：梁元帝承制以始興郡爲東衡州，以頤爲持節、都督東衡州諸軍事、東衡州刺史。尋授使持節、都督衡州諸軍事、衡州刺史。

據前考湘州都督與廣州都督，梁世皆不督衡州，則此衡州都督爲一獨立督區也。

陳不置衡州都督，而置桂州都督。如陳書淳于量傳，梁元帝承聖中，出爲持節、都督桂定東西寧等四州諸軍事、桂州刺史。高祖受禪，累進將軍都督刺史並如故。世祖天康元年入朝。則在任十餘年。前考湘州都督，此時期兼督桂州，則此桂州都督非

獨立督區也。

此外，陳世新置諸州都督尚可考見諸傳。如黃法廳傳，「(梁末)太平元年，割江州四郡置高州，以法廳爲使持節、散騎常侍、都督高州諸軍事、信武將軍、高州刺史，鎮于巴山。」是高州刺史加都督也。荀朗傳，天嘉中，爲使持節、都督霍晉合三州諸軍事、合州刺史。黃法廳傳，太建中，爲使持節、都督合霍二州諸軍事、合州刺史。是合州刺史加都督也。徐敬成傳，持節、都督安元潼三州諸軍事、安州刺史。是安州刺史加都督也。陳詳傳，天嘉中，假節、都督吳州諸軍事、吳州刺史。趙知禮傳，持節、督吳州刺史同。是吳州刺史加都督也。南康王曇朗傳，子方慶，太建中，假節、都督定州諸軍事、定州刺史。是定州刺史加都督也。其詳不能盡考，要多僅督本州，非大都督區矣。



魏、蜀、吳三國，都督皆用勳臣爲之。西晉則多用親王。據吳廷燮晉方鎮年表，關中都督及督鄴城守諸軍事皆用諸王，豫州都督多用諸王，餘則或用勳臣或用親王無定例。晉書荀勗傳云：「時議遣王公之國。帝以問勗。勗對曰，諸王公已爲都督，而使之國，則廢方任。」是諸王例爲都督也。至東晉則用大臣。宋齊以下，荆揚仍如東晉有抗衡之勢。爲其權重，亦用親王爲之，以鞏政權。沈約論之云：

「江左以來，樹根本於揚越，任推轂於荆楚。揚土自廬蠡以北，臨海而極大江，荆部則包括湘沅，跨巫山而掩鄧塞，民戶境域過半於天下。晉世幼主在位，政歸輔臣，荆揚司牧，事同二陝。宋室受命，權不能移，二州之重，咸歸密戚。」(宋書何尚之傳史臣曰)

所云「密戚」謂親王也。

按宋書南郡王義宣傳云：

「初高祖以荊州上流形勝，地廣兵彊，遺詔，諸子次第居之。謝晦平後，以授彭城王義康；義康入相，次江夏王義恭；又以臨川王義慶宗室令望，且臨川武烈王有大功於社稷，義慶又居之。其後應在義宣，上以義宣人才素短，不堪居上流。十六年，以衡陽王義季代義慶，而以義宣代義季爲南徐州刺史，都督南徐州軍事。……而會稽公主(太祖之姊)每以爲言，上遲回久之。

二十一年，乃以義宣都督荆雍益梁寧南北秦七州諸軍事、車騎將軍，荊州刺史……」

又臨川王道規傳云：

「子義慶。……元嘉……九年，出爲使持節、都督荆雍益寧梁南北秦七州諸軍、平西將軍、荊州刺史。荊州居上流之重，地廣兵強，資實兵甲居朝廷之半，故高祖使諸子居之。義慶以宗室令美，故特有此授。」

則荊州之用親王，乃出武帝遺命，以義慶之親賢猶爲特授，其嚴於任授可知。至於揚州，雖無具體之遺命與規制，然王景文傳云：

「太宗翦除暴主，……徵爲尚書左僕射，領吏部、揚州刺史。……景文屢辭內授。上手詔譬之曰：庶姓作揚州，徐干木、王休元、殷鐵並處之不辭。……司徒以宰相不應帶神州；遠遵先旨，京口鄉基義重，密邇畿內，又不得不用驃騎（晉平王休祐）；陝西任要，由來用宗室，驃騎既去，巴陵理應居之（巴陵王休若）；中流雖曰閑地，控帶三江，通接荆郢，經塗之要，由來有重鎮；如此則揚州自成闕刺史；卿若有辭，更不知誰應處之？」

據此而言，揚州雖不必絕對用親王宗室，但庶姓爲之究屬異常也。又劉延孫傳云：

「大明元年，……出爲鎮軍將軍、南徐州刺史。先是高祖遺詔，京口要地，去都邑密邇，非宗室近戚不得居之。延孫與帝室雖同是彭城人，別屬呂縣，……由來不序昭穆。延孫於帝室本非同宗，不應有此授。時司空竟陵王誕爲徐州，上深相畏忌，不欲使居京口，遷之於廣陵。廣陵與京口對岸，欲使心腹爲徐州，據京口以防誕，故以南陵授延孫，而與之合族，使諸王序親。」

按宋武帝由京口起事平內亂，成大業，故特重其地，遺詔亦以宗室居之也。

大抵宋世都督以揚荆爲重，南徐次之，故皆用親王或宗室諸王爲之。其次南兗、南豫、江、湘、會稽五鎮亦半用諸王爲之。郢、雍、徐、豫、廣諸鎮參用諸王爲之，餘則庶姓任職矣。齊、梁、陳三代，郢、雍形勢轉重，故亦多用親王，餘則略承宋制，無所改易。

〔附記〕 本文承陳槃先生百忙中抽暇惠閱一過，特此謹致謝忱。又本文原擬繪製附圖，事忙未果。俟有再版時機，當爲補繪。 四十五年一月廿八日校畢記